

Isipla wei long promotim bisnis bilong yu

GUTPELA KWALITI, GUTPELA PRAIS LONG PNG

Bisnis Kads

K120 200 kads + takis
Printin tasol
Wanpla sait, ful kala 300 gsm pepa.

K175 200 kads + takis
wantaim disain wok

Only at... **THEODIST LTD**
THE STATIONERY SUPERMARKET
Kulgeral Drive, POM
Phone: 013 9800 / 7232 1100
sales@theodist.com.pg

Maribum Road, LIA
Phone: 012 5180 / 7051 2854
sales@theodist.com.pg

KOLIM MIPLA NAO!



The Catholic Reporter

Pes 9,10,19 na 20

Volantia dokta bilong Saina helpim

PNG helt

Frieda Sila Kana i raitim

PAPUA Niugini i gat bikpela nid long helt kea long olgeta hap, tasol yumi sot yet long ol helt woka.

Las wik yumi lukim sekeri bilong helt i toktok long ol trening koles bilong ol nes long ol i mas rejista gut na ranim ol skul. Tasol em i no haitim tok olsem i gat bikpela nid yet long nes na olgeta eria bilong helt long kantri.

Na long dispela wik, Minista bilong Nesenel Plening na Monitarim, Charles Abel i toktok long Nesenel Populesen Polisi na em tu i toktok long nid bilong ol helt wok i mas go insait long ol rural ples tu. "Sapos i gat wanpela nes long wanpela klinik o helt pos, em bai kamapim bikpela senis long helt bilong ol pipel long hap," Mista Abel i bin tok.

I go moa long pes 2...



REN KAMAPIM WARAPAK: Bikpela ren long kantri na insait long Pot Mosbi tu i mekim ol liklik wara i tait na ol ples i bagarap. Wara i pulap long olgeta hap bikos no gat gutpela rot bilong wara long go aut. Adventure Park long 14 Mail ausait long Pot Mosbi i wanpela hap we ol pipel i save laik long go na mekim ol liklik kaikai i pulap long wara nau. Minista bilong Spots, Pasifik Gems na Nesenel Iven, Justin Tkatchenko i putim dispela poto long face book na tok, "Adventure Pak em i Wara Pak nau. Em i hat long bilipim. Olgeta enimal, ol pisin i seif na ol pukpuk i amamas stret long Wara Pak".

SP HUNTERS

now on **tvwan**

Purchase a Digicel Play Box today K169
and get front row seats to all the action

WWW.TVWAN.COM.PG

available on
Digicel play

Madang Festival bai kamap long Kwins Betde wiken

James G. Kila i raitim

SIAMAN bilong Madang Visitas na Kalsarel Bureau (MVCB), Sir Peter Barter i tokaut olsem Madang Festival nau bai kamap long olgeta Kwins Betde wiken namel long Jun 6 na 8.

Dispela bai givim sans long Madang long pairap na soim kala bilong en pastaim long ol arapela bikipela so o festival long kantri olsem Goroka na Mt Hagen So.

Long ol yia pastaim, Madang Festival i save kamap long mun Septemba long taim bilong indipendens aniveseri bilong PNG. Tasol long dispela yia festival bai kamap long mun Jun.

Sir Peter, husat i save go pas long promotim turism indastri long PNG i tok kain bikipela festival olsem i nidim fainens o mani sapot olsem na askim nau i go long ol kampani long Madang na PNG long helpim long kamapim Madang Festival.

Sir Peter i tok wanpela Madang Festival Komiti em ol i kamapim pinis na i save bung olgeta wik long ol mun i go pinis long redim festival. Dispela komiti i kamapim pinis wanpela program bilong 2015 Madang Festival. Ol i redim wanpela logo pinis na salim infomesen i go long



Madang Festival bai paia lait wantaim tumbuna singsing long Kwins Betde

PNG Turism Atoriti, Air Niugini, ol lain bilong bringim ol turis na tu tok save i go pinis long midia lain long promotim dispela festival.

Long nau yet komiti i lukim long painim ol gutpela sponsa i kam long ol bisnis haus long Madang na PNG. Ol i gat ol sponsasip pakes olsem platinum we sponsa i ken givim K20,000 na bai i gat nem olsem meja sponsa bilong festival, gold sponsa em K10,0900 na silva sponsa em K5,000 na brons sponsa em K2,500.

Sir Peter i tok dispela festival bai wanpela nesenel program na bai stap long kalenda bilong Nesenel

Events Kaunsil stat long 2015 na ol yia i kam. Dispela festival tu bai Madang i ken yusim long bringim ap gen gutpela nem bilong en, promotim turis industri na invetsmen long provins, na tu, promotim nem bilong ol sponsa.

Madang em wanpela naispela provins wantaim gutpela ol nambis na ples insait long PNG, na em wanpela namba wan ples we ol ovasis turis i save laik go stap na lukim. Olsem na Sir Peter Barter wantaim ol komiti bilong en i laik kirapim gen nem bilong Madang provins long sait long turism.

Bikipela ren kamapim hevi long Madang-Ramu haiwe

James G. Kila i raitim

BIKEPela pret long graun bruk long Madang-Ramu haiwe i kamap bikos dispela bai givim bikipela hevi long sevis i go long Madang taun.

Nau yet planti seksen bilong Madang-Ramu na Lae rot i lukim graun i bruk na liklik hap rot tasol i stap. Sapos moa ren i pundaun dispela ol rot bai wara i karim i go na no gat rot bai stap.

Dispela em wanpela strongpela toktok wanpela eksekutiv bilong Inlen Paipain Lenona asosesin long Ramu Nikel Projek, John Koti i mekim.

Wantok Niuspepa long las wik i raun i go long Usino na i lukim olsem planti seksen bilong rot i bruk na sapos ol kar i popaia ol i ken pundaun i go daun long bikipela ol baret.

Madang provins i save kisim ol kago na sevis bilong en i kam long Lae long dispela rot tasol i gat hevi i stap

bikos sampela seksen bilong rot i bruk na i gat bikipela baret i stap.

Taim bilong bikipela ren long Madang i stat long Janueri yet i kam inap mun Mas na i wokim ol liklik baret wara long bus i tait na go long rot na rausim rot long sampela seksen bilong haiwe.

Dispela Madang-Ramu Haiwe em wanpela bikipela rot tasol i save bringim bisnis na sevis i go long Madang.

I no long taim i go pinis, John Koti wantaim ol lain bilong em long Ono i bin helpim divelopa bilong Ramu Nikel Main long stretim rot klostu long Kawawar maket bihain long ren i mekim graun bruk.

Mista Koti i tok ol draiva bilong ol PMV bas na trak i mas was gut na draiv long Madang-Ramu haiwe bikos planti seksen bilong em graun i surik na i ken bruk pundaun enitaim.

Narapela hevi tu long

Madang-Ramu haiwe ol bus i gro aut long rot na dispela i givim hevi tu long ol kar i lukim ol yet na abrusim.

Long las wik *Wantok Niuspepa* i bin lukim wanpela kar i spit long Naru eria na i popaia na i go insait long bus taim narapela kar i ran long dispela rot em i go long en. Dispela hevi i kamap bikos ol gras i gro bikipela long arere bilong rot na i pasim ai bilong trefik long lukluk gut.

Hevi bilong bikipela ren na tait wara i kamapim hevi na bagarap long planti provins long kantri.

Kimbe long Wes Nu Briten i kisim taim long bikipela haiwara stat long las wiken i kam bikos ren i pundaun longpela taim. Wankain bikipela ren tu i pundaun long Mosbi siti na ol arapela ples insait long kantri.

Nesenel Weda Sevis bilong PNG i givim tok lukaut i go long ol manmeri long tingim sefti bilong ol long dispela taim.



Poto i soim graun bruk na bikipela baret i stap we i ken bruk moa yet long Iguruwe long Madang-Ramu haiwe na liklik hap tasol long ol kar i yusim. Poto: James G.Kila

I kam long pes 1...

Dokta bilong Saina helpim PNG helt

Dispela i soim tingting bilong gavman bilong PNG long stretim helt na sindaun bilong ol pipel. Olsem na wanpela gutpela samting i kamap namel long Helt Dipatmen na Saina gavman em long kisim sampela volandia dokta i kam long wok insait long Pot Mosbi Jeneral Haus sik, we em i nesenel riferal haus sik.

I gat 8-pela speselis dokta bilong kantri Saina nau i kamap pinis na i stap wantaim Pot Mosbi Jeneral Haus sik long mekim wok wantaim ol lokal dokta inap long tupela yia.

Lida bilong ol dispela dokta tim, Dokta Zhang Singsong i bin tok olsem ol dokta i bin kam wantaim wanpela meri bilong tanim tok (interpreter) na wanpela man bilong kukim kaikai bilong ol (Chef) i bin kamap long Pot Mosbi long Janueri 2015 tasol ol i no kisim tok orait bilong wok yet olsem na ol i wet yet.

Dispela dokta tim i gat wanpela Oral-Maxillo-Facial Surgeon, wanpela Orthopedic Surgeon, wanpela Pathologist, wanpela Urological Surgeon, wanpela Radiologist, wanpela Oncologist, wanpela Neurosurgeon, na wanpela Pediatric Surgeon.

Taim PNG i sot tru long ol dokta na ol narapela helt woka long helpim heltkea sevis bilong ol pipel, em i gutpela samting long ol dispela dokta i kam na helpim.

Dokta Zhang i tok 8-pela dokta wantaim tupela lain bilong helpim ol i kam aninit long wanpela agrimen bilong PNG Gavman wantaim Saina gavman long ol Saina bai salim ol volandia dokta i kam long helpim Pot Mosbi Jeneral Haus sik. Taim bilong ol long wok long PNG em inap long tupela yia.

Dispela program i bin stat long yia 2002 taim namba wan tim bilong old okta i bin kamap long Pot Mosbi. Namba wan agrimen i bin kamap long yia 2000 taim PNG Minista bilong Helt i bin sainim dispela agrimen wantaim gavman bilong Saina.



Ol Saina dokta i volandia long wok long Pot Mosbi Jeneral Haus sik. Hia ol i sanap long fran bilong Pot Mosbi Jeneral Haus sik.

Na stat long 2002 i kam ol speselis dokta bilong Saina i wok long kami nap tupela yia na ol i go bek. Bihain gen narapela lain dokta i kam long stap narapela tupela yia. Dispela yia bai mekim namba 7 tim long kam long PNG.

Olgeta dokta bilong 2015-2016 tim i bilong Chongqing Siti bilong Saina. Dokta Zhang i tok dispela em i namba tu taim bilong em long kam long PNG na em i laikim tumas PNG. Namba wan taim em i bin kam wantaim narapela tim long yia 2002 i go 2004. Na meri bilong tanim tok, Chen Jin em i namba tu taim bilong em tu. Namba wan taim em i bin kam long yia 21010 i go 2012.

“Mipela laik long kam long PNG long givim sevis

bilong mipela i go long ol asples lain. Ol Saina i gat bikipela moa save long speselis dokta wok tasol ol lokal dokta i gat bikipela moa save long ol kain kain sik i stap long komyuniti long olgeta kain sik. Olsem na mipela bai helpim wanpela, narapela na mekim wok wantaim long sevim ol pipel,” Dokta Zhang i tok.

Ol dispela dokta bai wok long Pot Mosbi Jeneral Haus sik tasol na i no long ol narapela haus sik long siti. Tasol ol i tingting long bihain taim bai ol i ken go long sampela komyuniti long siti o long ol ples klostu long siti na wokim sampela helt sekap long ol asples lain na givim ol marasin o salim ol i go long bikipela haus sik.

Olgeta skul i mas lainim Inglis

Bustin Anzu i raitim

OLGETA skul tisa insait long kantri i mas lainim ol pikinini long tok Inglis na i no moa long tok ples bilong ol, dispela em i tok lukaut bilong Edukesen Dipatmen.

Ol liklik pikinini long elementeri skul bai i no inap skul long tok ples. Tok ples bai kamap olsem wanpela sabjek long skul gen.

Deputi Seketeri, Dokta Uke Kombra i bin mekim dispela toktok long Balob Tisa Kolis taim ol i kam long witnesim seremoni bilong putim faundesens ston bilong ol nupela haus slip na klasrum las wik.

"Ol tisa i mas lusim tok ples long ol elementeri skul na lainim ol pikinini long tok Inglis. Dispela em sampela rifom o senis i kamap insait long Edukesen Dipatmen," em i tok.

Dokta Kombra i tok long wok bilong Yuropien Yunien (EU), em i mekim bikpela samting na ol i gat

bikpela luksave long ol.

"Tripela tisa koles, Balob, Gaulim long Rabaul na Madang long Madang, i kisim mani long EU long mak bilong 16 milien Euro. Bai ol i skelim dispela mani long tripela tisa koles long wokim klasrum na dometori o ples bilong slip," em i tok.

Embeseda bilong EU, Dokta Martin Dihm, Embesada bilong France Pascal Maubert, Morobe Gavana Kelly Naru na Prinsipel bilong Balob, Jerry Hendin-gao, i bin stap long dispela bung.

Dokta Kombra i tok planti rifom i bin kamap insait long Edukesen Dipatmen na wanpela bilong dispela em long go bek long Stendet Beis Edukesen (SBE). Ol i lusim pinis Autkam Bes Edukesen o OBE.

Em i tok olgeta skul insait long kantri i kisim dispela toksave pinis olsem nau ol bai yusim SBE long lainim ol pikinini long ol elementeri na praimer skul insait long kantri.

DWU na Yunitek bai wok bung long serim ol risos

James G. Kila i raitim

TUPELA BIKPELA yunivesiti long kantri em Di-vain Wod Yunivesiti (DWU) na Yunivesiti ov Teknoloji (Yunitek) bai wok bung long serim ol risos na ol samting bilong wok long strongim kwaliti edukesen bilong ol sumatin.

Long las wik Sande Mas 5, wanpela liklik seremoni i bin kamap long Madang long DWU we i lukim DWU wantaim Yunitek i sainim memorandum ov agrimen (MOA) long lukim dispela wok bung.

Em i namba wan taim tru long DWU na Yunitek i wokim kain samting olsem long serim ol risos.

DWU em yunivesiti bilong Katolik Sios we i gro hariap tru wantaim gupela menesmen na em i lukim planti nupela developmen insait long sotpela taim, na i winim ol arapela bikpela gavman yunivesiti long PNG wantaim ol risos bilong em.

Dispela MOA bai strongim wok bung namel long dispela tupela yunivesiti long

givim kwaliti edukesen na wok bung long givim save long ol sumatin long wanem ol developmen eria na gutpela development long edukesen.

Presiden bilong DWU, Pater Jan Czuba na Vais Sensela bilong Yunitek, Dokta Albert Schram i saingim dispela MOA long ai long ol arapela lain olsem Dokta Subramaniam Gopalakrishnan bilong Yunitek na Vais Presiden bilong DWU, Pamela Norman.

Pater Jan Czuba i tok em i bikpela samting tru long tupela bikpela yunivesiti long kantri i wok bung long kamapim kwaliti edukesen we i wankain long gupela bilong ol sumatin bilong PNG.

Em i tokaut tu olsem bikpela samting em DWU wantaim Yunitek i no ken kamapim wankain ol stadi we tupela yunivesiti o ronim long institusen bilong ol. Tasol dispela wok bung bilong tupela bai stap long givim kwaliti edukesen long ol sumatin husat bai kamap lida bilong dispela kantri long bihain taim.



Dokta Kombra wantaim Gavana Naru na ol narapela bikman long taim bilong putim ston mak. **Poto: Bustin Anzu**

Helping PNG and the South Pacific

grow!

Bank South Pacific (BSP) is the regional leader in banking and financial services. Since 2010, we have grown our network so all customers have convenient and affordable banking access - anywhere, anytime.

We offer state of the art electronic banking solutions via Mobile and Internet Banking. Our network of Branches, Agents, EFTPoS and ATMs is the largest across PNG, Fiji and the Solomon Islands.

BSP's strategy combines innovation, with market leading products and services, supported by professional and passionate people, ready to help you grow your business or personal finance.

We are helping the Pacific Grow. **GROW WITH BSP.**

	2010	2015
BRANCHES	68	111
AGENTS	86	287
ATMS	270	432
EFTPoS	3,275	11,882
MOBILE BANKING*	K3million+	K36million+
CUSTOMERS	843,468	1.47million+
GROUP NPAT	K286million	K507million (2014)

*Number of transactions (2014)

BRANCHES

AGENTS

EFTPoS

ATMS

MOBILE

Photo: BSP's Flagship Branch in Port Moresby. Harbour City Branch, BSP Haus.

Stretim independen bodi bilong pait egens korapsen:Polye

Stanley Nondol i raitim

OPOSISEN i singaut long gavman long hariap na stretim ol independen bodi bilong pait egens pasin bilong korapsen. Em i tok bikipela pablik mani i wok long kam insait long basket bilong gavman long ol pipel i mas lukim divelopmen na sevis long ol blesing i kamap long gaun bilong ol.

Oposisen lida Don Polye i tok gavman i mas stretim Soveren Welt Fan (SWF), independen Komisins Egens Korapsen (ICAC) na Ekstrativ Industri Trensperensi Inisitiv (EITI) long kamap lo bikos bikipela winmani i kam insait na pasin korapsen i bikipela yet.

Don Polye i tok ol dispela bodi em impoten long gavman i stretim na mekim kamap lo hariap long ol i ken menesim ol bikipela winmani bilong oil, ges, maining na ol arapela risos bilong kantri. Em i tok i no gat wanpela independen bodi long menesim ol dispela mani aninit long lo na

long strepela rot.

SWF Bil i go long namba wan riding bilong palamen long Februeri taim Praim Minista Peter O'Neill i tebolim long palamen. Na palamen tu i oraitim ICAC bill las yia, tasol wok i no kamap yet.

Mista Polye i tok gavman inap long stretim SWF Bil bipo long kantri bai salim PNG LNG ges i go aut long wol maket tasol dispela i no kamap. Na SWF Bil i kam leit long palamen.

Oposisen lida i singaut long ExxonMobil long tok klia long kantri hamas mani PNG LNG i mekim long ol ges kantri salim go aut long mun Me las yia i kam inap nau.

Praim Minista O'Neill i tokim palamen kantri i no stretim SWF bil yet olsem na ExxonMobil i menesim ol winmani na kantri bai kisim bikos benk i bin givim kliarens pinis.

Mista Polye i tok i no gat ol independen bodi long menesim mani na gavman i wok long salim i go long ol bisnis han olsem Nesenel Petroleum Kampani (NPCP)



Oposisen lida, Don Plolye

Em i mekim ol dispela toktok long bekim bilong NPCP i tokaut long mekim K1.1 bilien dividen long LGNG projek.

Oposisen lida i tok, em i wok bilong gavman bilong de long stretim ol independen bodi long menseim winmani long givim sevis i go bek long ol pipel bilong kantri. Tasol i no gat dispela i kamap long dispela taim we wol korapsen indeks i toK PNG em wanpela bikipela korap kantri long wol.

Em i tok kantri nau i gat planti ol risos na winmani i pulap na wini ol yia bipo tasol planti hap i lukim ol sitisen i stap turangu laip yet. Na hgavman i tok tok long bikipela winmani na bikipela bilien baset.

Ol Yalu wok bung wantaim Saina

Bustin Anzu i raitim

OLASPLES bilong ples Yalu, namel long Lae na Nadzab i bungim tingting long mekim wok bilong katim diwai wantaim wanpela bikipela kampani bilong Saina.

Long statim dispela wok, kampani ya i gat pinis K13 milien long kamapim dispela wok.

Dispela kampani i gat gutpela wok poroman wantaim ol papagraun na tu, em i wanpela bikipela kampani long katim diwai wantaim ol asples insait long wol.

Sino Andean PNG (SAPNG) i pasim tok wantaim ol asples bilong ples Yalu long kamapim wanpela somil long katim diwai.

Em i gat het opis bilong em long Shanghai, Saina na em i mekim ol wok bilong diwai insait long Saut Amerika tu.

Ol bai i no inap katim diwai na lusim nating tasol bai senisim wanpela diwai gen. Na dispela em winim wok mak tru na Gavana Kelly Naru i amamas wantaim dispela kampani bilong Saina long wok bung wantaim ol lain long em.

"Yupela i kamap long rait taim stret long Lae we ol i kolim long namba wan industrial siti bilong PNG. Dispela wok bilong yupela bai kamapim planti wok divelopmen insait long provins



Gavana Kelly Naru i brukim graun long masin long statim wok bung wantaim Saina.

na tu, kamapim sampela kain wok bilong ol asples lain tu," em i mekim dispela toktok bihain long graun breking seremoni long ples Yalu, ausait tasol long Lae siti.

Naru i tok ol kain lain olsem ol i gutpela long wokim bisnis bilong diwai na i no sampela arapela husat i kam long nem bilong helpim ol liklik manmeri na

promisim ol wantaim kain kain samting tasol nogat, ol i kisim mani na go pinis.

SAPNG bai katim diwai bilong ol asples na kisim i go long somil na mekim kamap plang na plaiwut, na salim. Aples bai i gat bikipela luksave.

Ol asples Yalu i bin amamas long dispela wok we bai kamap insait long ples bilong ol.

Hap hap nus

Tok lukaut long ren na win i bagarapim ples

NESENEL Weda Sevis i tok save long ol pipel long kantri long putim was long dispela taim bikos tupela senis i kamap na dispela kamapim planti ren we birua i ken kamap long ol ples olsem Mosbi, Galp, Daru na ol nambis ples long Sauten rijon na long Hailans rijon.

Dairekta bilong Nesenel Weda Sevis Samuel Maiha i tok low pres i kamap long Koral Si na kam olsem long Galp ov Karpen-tria long Australia.

Em i tok dispela sistem i kamapim strongpela win we i kamap long nambis bilong Papua long Pot Mosbi na Daru long Westen provins.

Mista Maiha i tok dispela sistem bai muv i go olsem long Noten Teritori, Australia long dispela wik.

Narapela low presa i kamap long Pasifik Osen long Solomo Ailan klostu long Vanuatu. Dispela i kamapim notwes win long Solomon Si we i karamapim Milen Be na Bismark Si na long solwara bilong Manus.

Dispela strongpela win bai kamapim bikipela ren long noten sait bilong Nakanai na i kamapim bikipela ren long Wes Nu Briten na long Not kos bilong Is Nu Briten.

Mista Maiha i tok Hailans rijon i lukim nomol notwes ren inap long mun Me. Em i tok Hailens rijon i gat nomol taim bilong ren.

Minista saspensim PNG Pawa dairekta na bod

Minista bilong Pablik Entaprais, Ben Micah i saspensim bod ov dairekta bilong PNG Pawa Ltd na siaman Larry Andagali.

Mista Micah i tekova long olgeta ekspensidisa bilong kampani na i dairektim Sif Eksekutiv Opisa John Tangit long no ken go insait long wok operesen bilong PNG Pawa.

Long wanpela pas bilong Minista Micah long dispela wik Mande i go long Mista Andagali, i tok Nesenel Eksekutiv Kaunsil (NEC) i mekim disisen long praivetaisim bisnis bilong pipel, PNG Pawa.

Tasol CEO Tangit i tok em bai mekim wok bilong em yet aninit long lo. Em i tok Minista Micah i no gat rait long stopim wok bilong em.

Minista Micah i tok wok nau stat long PNG Pawa long gavman bai praivetaisim o salim i go long wanpela praivet kampani.

Em i tok em bai mekim wanpela sabmisin i go long NEC long liklik taim long wanem rot PNG Pawa i go.

Ol oda Minista Micah i givim long bod na dairekta bilong PNG Pawa em;

-Olgeta wok bilong bod na dairekta i nau

stap long saspensim inap long sampela taim em bai tok klia long dispela;

-CEO John Tangit i no ken mekim wok i go insait long wok operesen bilong imenjensi tim bilong PNG Pawa, ol i wok nau long kisim pawa bil.

-Ol wok konsaltesen na ol wok we ol ausait lain i save mekim long PNG Pawa bai i stop nau na ol i no ken go insait long opis bilong PNG Pawa na ol i no ken wok moa.

-Bod, dairekta na ol konsalten bilong ausait i mas stop long toktok wantaim ol benk o ol arapela lain long bisnis bilong PNG Pawa.

-Tok orait bilong ekspensidisa o yusim mani bilong PNG Pawa bai kam long Minista Micah tasol. Sapos em i no stap bai imejensi kontrola Tom Ur bai givim tok orait.

Minista Micah i tok moa olsem sapos bod, dairekta na CEO i no bihainim ol oda bilong em bai ol i kisim mekimsave aninit long seksen 9 bilong Isensel Sevis Ekt 2000.

Tasol Mista Tangit i tok em bai mekim wok bilong em yet aninit long lo. Em i tok Minista Micah i no gat rait long stopim em long wok bilong em.

Moa long 20,000 kot keis stap yet

NESENEL na Suprim kot i gat moa long 21,000 keis i stap long kliaim na ol dispela keis em bilong las 32 yia stat long 1983 na i kam inap nau. As bilong dispela hevi em ol loya long i no mekim gut wok bilong ol long ol keis ol i failim long bikipela kot.

Sif Jastis Sir Salamoa Injia i sutim tok long ol loya i no mekim gut wok bilong ol long harim kot bilong ol keis na pinisim hariap.

Jastis Injia i tok long olgeta yia ol keis i wok long go antap bikos kot i no inap long harim na pinisim long taim na tu, ol loya husat i helpim long harim ol keis i no hariap long mekim ol wok.

Jas Injia i tok nesenel kot nau i gat 20,000 keis i stap yet long 1983 i kam inap nau. Na Suprim kot i gat 1,200 keis stap yet na em bilong yia 1994 i kam inap nau.

Sir Salamo Injia long las wik Fraide long

taim bilong edmisin bilong ol nupela loya, i tok ol kot bilong Nesenel na Suprim kot i wok long suruk go long ol sampela mun na yia bihain.

Em i tok panti bilong ol keis i go long bikipela kot em ol loya i makim klaien bilong ol na failim. Na ol loya yet bai mekim disisen long keis bai go het o ol bai rausim.

Sir Salamo Injia i tok sapos ol loya mekim gut wok bilong ol, bai namba bilong ol keis bai kam daun long mak bilong 30 pesen.

Em i tok sampela keis ol i kisim i go long bikipela kot i no gat gutpela as long en. Na planti bilong ol dispela ol keis i no bihainim gut ol rul bilong kot na planti pepa wok i no bihainim lo na kot rul.

Sif Jastis i salensim ol nupela loya long mekim gut wok na helpim kot long skelim ol hevi aninit long lo bilong kantri.

Ol outsait lain bai no inap kisim graun aninit long nupela lo

OL outsait lain na ausait bisnis investa i kam long kantri baim no inap baim graun taim Dipatmen bilong Lens na Fisikel Plening i pinisim rivi bilong Len Ekt na palamen i oraitim.

Minista bilong Lens Benny Allan i mekim dispela toktok taim em i givim tupela len taitel i go long Tabaule Entaprais long Is Nu Briten las wik.

Mista Allan i tok dipatmen i kamapim senis long Lens Ekt long givim graun taitel i go long PNG tasol na i no ol outsait lain na ol investa bilong ausait.

Minista Allan i tok aninit long nupela lo, em bai bikipela tambu long ol ausait lain i kisim graun long kantri. Gavman bai givim long ol PNG sitisen tasol. Ol bai no inap aplai long kisim taitel. Sapos ol laik kisim taitel ol i mas kamap sitisen bilong PNG na ol i laik stap na dai long kantri.

Em i tok gavman i ken sab lisim graun i

go long ol ausait long sapot ol i mekim join vensa bisnis wantaim ol sitisen bilong PNG.

Gavman I gat 3 pesen bilong graun na 97 pesen em tumbuna graun bilong ol papagraun bilong PNG.

Minista Allan i tok ol graun gavman i kisim na i gat taitel pinis em bilong gavman na bai no inap sensim o givim bek long ol papagraun.

Mista Allan i tok planti ol ausait lain i kam nating long kantri na go bek long kantri bilong ol wantaim bikipela milien kina bihain long ol i mekim bisnis long graun bilong PNG.

Em i tok gavman nau i laik strongim SME bisnis na i laik sapotim ol papagraun long kisim taitel na mekim bisnis. Em i tok nau i taim long sekim graun na sapotim ol papagraun yet. Ol ausait lain i save kam kisim graun long pasin korapsen na mekim bikipela milien kina long planti yia.

BSP sapotim helt wok long Nu Ailan

AUSTRALIA Dokta Intenese-nel (ADI) nau i ken go long moa rural komyuniti insait long Nu Ailan Provins na bringim ol besik helt kea sevis wantaim K50,000 i kam long Benk Saut Pasifik.

ADI, wanpela ogenaisesen bilong wok marimari i bin stap long Nu Ailan long 2003 i kam inap nau. Dispela ogenaisesen i save salim ol volandia dokta i go mekim helt patrol long ol rural ples i longwe long taun, wantaim ol helpim bilong ol helt tim long provins.

Long 2011 i kam, ADI i karamapim olsem 1,693 aua long wokim ol grup trening bilong ol helt woka long ol rural ples na ol i wokim de patrol inap long 364 de na ol i givim marasin long 9,423 siklain insait long 422 klinik long provins.

ADI Dokta, Max Osborne i

amamas tru long sapot bilong BSP na em i givim tok promis olsem dispela helpim bai helpim ADI long mekim planti wok long sait bilong helt patrol.

"Mipela i gat bikpela tenkyu long Benk Saut Pasifik long sponsa bilong ol. Em i soim olsem benk i laik sapotim wok bilong mipela long provins. Mipela i amamas tu olsem em bai helpim mipela long bringim ol helt kea long ol rural populesen long Nu Ailan Provins," Dokta Osborne i tok.

"Wantaim helpim bilong ADI long bringim ol Helt Patrol wok, ol pipel i stap longwe long ol liklik ailan na long bus ples nau i gat praimeri helt sevis we wanpela dokta o helt ekstensen opisa i lukim ol," em i tok.

Wantaim dispela mani, ADI

bai inap long mekim moa wok na bai ol i ken givim ol imunaisesen o banis marasin na sut long ol bebi na ol mama i ken kisim sekap na helpim. Em bai bringim helt edukesen na awenes tu i go long ol pipel.

BSP Kavieng Brens Menesa, Madeleine Leka i tok long taim em i givim sek, olsem, benk i amamas long sapotim dispela kain gutpela wok.

"BSP i amamas long stap olsem wanpela patna long bringim ol gutpela helt kea long ol pipel i stap longwe long ol sevis insait long provins. Olsem na mipela i amamas long sapotim ADI," em i tok.

"Wanpela komyuniti i stap helti bai givim moa helpim long wok developmen bilong provins," Mis Leka i tok.



BSP Tim, L-R Freda Genun BSP Rijinol Rural Menesa- NGI na Madeleine Leka i givim K50,000 sek i go long mausman bilong ADI Dokta Max Osborne wantaim ol ADI Patrol (2)

Skulim ol pikinini long setelmen Kukawi praimeri i gat nupela dabol klasrum

"Dispela Out of School Children (OOSC) rot em mi save kolim top daun wei bilong ol hevi. Em bai gat planti wok bihain long ol i stretim hevi. Em bai gat planti plening, ol bung, ol woksop, ol diskasen, raitim ripot, developim streteji na planti moa bipo ol tok orait i kamap, kisim mani na wok i ken kamap. Nau yet planti sumatin i stap autsait long skul yet," Pater John Glynn, i tok.

Pater Glynn i tok Botom Ap rot em long luksave long pikinini i stap long strit, i no long skul, na wok long putim pikinini long skul. Dispela em ogenik wei, olsem planim wanpela sid, givim wara long en na lukim em i gro.

Long dispela tok piksa, em i tok Botom Ap i olsem putim laik bilong pikinini namba

wan. Em i tok ol narapla olsem plenim, developim infrastraksa, na ol narapela em namba tu.

Em i tok Top Daun rot em i no ogenik tasol em i olsem wanpela sistem na i gat gutpela kaikai bilong em. Tasol wanem samting sistem i laikim long en bai go pas, na laik bilong pikinini bai stap namba tu.

Tasol Pater John i tok Botom Ap bai putim laik bilong pikinini i go pas long laik bilong sistem. Dispela em i tok wanem kain risos i stap ol i bai yusim long ol pikinini.

Em i tok wanpela tok piksa em long ol 'bek yad' Early Learning Centre i go aut long ol setelmen na ol liklik taun insait long ol siti.

Em i tok dispela i bin kamap taim ol papamama na ol sitisen husat i wari long ol pikinini i raun long strit.

Em i tok ol i helpim ol wantaim wanem liklik samting ol i gat, na bihain ol i painim sapot.

Em i tok Faundesen bilong ol meri na pikinini i bungim birua (WeCARE!) i sapotim 6-pela Early Learning Centre long Pot Mosbi wantaim 500 pikinini. Ol volandia tisa i gat Gret 10 na 12 setifiket. Em i tok ol i save skul long wanpela trening program bilong ol tisa olsem long 1-pela yia.

Digicel Faundesen i save sapotim dispela wantaim siti gavman na ol narapela. Digicel Faundesen i save sapotim ol Early Learning Centre we i save helpim, olsem 3, 000 pikinini.

Em i tok WeCARE i save helpim ol Early Learning Centre na baim trening bilong ol tisa, givim ol samting, stretim ol klasrum,

mekim toilet na tenk bilong putim wara. Em i tok ol i save givim pikinini, ol buk, samting bilong pilai na yunifom.

Pater John i tok WeCARE i gat ol narapela program olsem helpim ol tarangu famili, ol singel mama na ol disabel pikinini.

Em i tok Edukesen Dipatmen i no save luksave long kain pikinini olsem. Ol tisa i no save rejista na ol i no save stap long nesenel senses bilong ol skul. Ol i no inap long stap insait long ol pablik mani taim ol i tisim ol yangpela sitisen bilong PNG.

Long dispela em i tok ol i helpim ol pikinini tasol ol i no baihainim laik bilong sistem, long wanem gavman i no luksave long ol na ol pikinini skul tu ol i kaunim ol olsem Out of School.

OL sumatin, tisa na ol mamapapa long Kukawi Praimeri Skul long Wes Yangoru Lokal Level Gavman long Is Sepik i amamas long nupela dabol klasrum bilong ol i op long las wikTunde.

Dispela nupela bilding i gat tupela klasrum wantaim opis bilong het tisa i stap namel. Olsem K100,000 long 2014 Distrik Sevis Improvmen Program (DSIP) mani i go long skul edministresen long dispela klasrum projek.

Kukawi Praimeri skul em i nupela skul we i bin kamap long 2012 long helpim ol pikinini long 6-pela komyuniti olgeta. Tasol em i no rejista wantaim nesenel edukesen sitem yet.

Minista bilong Tred, Komes na Industri, Richard Maru, i askim ol

pipel long lukautim ol nupela bilding.

Em i tokim ol pipel i bin stap long opening seremoni olsem opis bilong em na Distrik Edministresen bai putim edukesen i go pas long ol narapela developmen.

Het tisa, Brian Hecko, i makim maus bilong skul na tok tenkyu long Minista Maru na Distrik Edministresen long givim mani long sanapim nupela bilding.

Mista Hecko i tok moa olsem em i nupela skul na ol i kisim tok orait pinis long Edukesen Dipatmen olsem skul bilong ol i rejista pinis tasol ol i no kisim kod namba bilong skul yet.

Minista Maru i bekim na tok em bai traime long helpim ol long rejistresen bilong skul.

Trening program bilong Edukesen Dipatmen i op

Esther Bralyn Wani i raitim

NESENEL Dipatmen bilong Edukesen wantaim Australia Hai Komisina i opim trening bilong Diploma long Edukesen Menesmen Trening Program (DEMTP) long Pot Mosbi long dispela wik.

Dispela diploma program bai kamap insait long 9-pela wik wantaim ol patisipen i kam long ol narapela provins.

Deputi Seketeri bilong Tising na Edukesen Stended, Dokta Eliakim Apelis, i tok i gat 14 modul long lukim na long ripot em i soim ol strong na ol hevi. Em i tok dispela bai soim ol stretejik gep.

Em i tok moa olsem bai ol i toktok long dispela ol gep na mekim trening bilong ol

long lidasip, menesmen na edministresen long lukluk long ol gep.

Dokta i tok dispela trening bai salensim husat i stap insait long dispela program. Em i tok dispela program bai mekim ol i mekim gut wok na lukautim risos na ol pipel.

Kaunsela bilong Australia Hai Komisina, James Hall, i tok dispela trening bai givim ol gutpela tingting, ol skil na save long helpim ol long mekim gut long ol wok bilong ol insait long edukesen sistem.

Em i tok moa olsem dispela diploma long edukesen sistem em i wanpela rot we Australia i helpim Dipatmen bilong Edukesen long stretim gut edukesen menesmen na apim kwaliti bilong lainim na skulim long PNG.



Ol meri i stap insait long dispela diploma trening program.

Divine Wod Yunivesiti wantaim Edukesen Dipatmen i kamapim dispela tren-

ing program wantaim sapot bilong Australia gavman.

Mista Hall i tok amamas

long Dipatmen long kisim sampela meri tu long dispela trening program long wanem

ol meri i save givim planti iekonomik na sosol helpim insait long kantri.



Ristoresen, Rifomesen, Modenaisesen bilong Nesenel Palamen

Ol wok bilong Klak long Nesenel Palamen

Save long Palamen bilong yu wantaim Hon. Theo Zurenouc, MP.

Welkam long namba foa hap bilong “Save long Palamen bilong yu”. Long las wik, mi toktok wantaim yu long “ol wok bilong Spika”. Namba wan; spika i save lukautim ol bung insait long semba. Namba tu, spika i save was long ol wok long palamen olsem het bilong lejisletiv long gavman. Namba tri, spika i save makim palamen long ol toktok wantaim eksekutiv sait bilong gavman, gavana jenere lna ol foren het bilong gavman. Nau, bai mi toktok wantaim yu long “ol wok bilong Klak long Palamen”.

Wok bilongKlak long Palamen

Klak i gat tupela wok wantaim olsem edministretiv wok na speselis bilong semba long ol lo bilong palamen na ol wok na prektis insait long palamen.

Wok insait long semba

Insait long semba long taim bilong sesen, Klak i save sindaun long het bilong tebol bilong Haus, fran long sia bilong Spika. Klak i save stap klia stret long ol memba bikos long ol blek pela gaun.

Klak bilong Palamen i wanpela tasol i no memba husat i save gat wok bilong toktok taim palamen i wok. Klak i save tokaut long wan wan ol samting long bisnis. Narapela wok bilong Klak long toktok em long ‘ritim’ ol bil long wan wan hap bilong progres insait long Haus. Long wan wan hap, Klak i save ritim het tok bilong bil tasol. Dispela wok i stat pastaim yet, bipo long prin na karim aut litresi, taim olgeta teks ol i pinisim long kamapim lo bai em i ritim i go long ol memba planti taim ol i laikim.

Long stat bilong wan wan Palamen, Klak i save kamap olsem siaman inap ol i makim nupela Spika. Haus i save mekim save wantaim wan wan samting long bisnis, na Klak i save rekotim ol disisenHaus i save mekim. Klak i save tok orait long olgeta eksen Haus i save mekim long ol wok bilong lejisletiv, taim ol i pasim bil.

Taim Haus i mekim fomal vot o wan pela memba i singaut long kamapim grup bilong ol memba (kwarum), Klak i save yusim o lbelo long singaut long ol memba long kam long semba. Taim long divisen, Klak i save kauntim ol memba i vot long ‘Ayes’. Mekim disisen, dibeit na divisen.

Wok bilong givim edvais

Wanpela bikpela wok bilong Klak em long givim edvais long Spika, ol komiti bilong Palamen, ol minista na ol memba bilong Palamen long wok bilong ol prosiding. Wan wan de bipo long haus i bung, Klak i save skelim ol bisnis skeduel bilong ol siting na tokim Spika long no gut sampela isu i kamap long prosiding. Taim Klak i sidaun long tebol, em mas olgeta taim harim gut ol dibet long wanem ol i ken singautim em long givim edvais long Spika o ol narapela long sampela samting i kamap long prosiding o teknikel hevi. Taim bilong prosiding, ol memba i ken askim Klak long edvais, long ol pont long oda ol i laik mekim, o mosen ol i laik muvim.

Lida bilong Haus(Minista i go pas long program bilong gavman bisnis) i ken toktok wantaim Klak long save long bisnis i go het.

Wok outsait long Semba

Autsait long semba, Klak i save stap long tokim Spika na ol memba long tokaut long ol toktok long ol stending oda, ol prektis long palamen na ol lo, na ol laik bilong Konstitusen na ol lo bilong Palamen na Haus. Klak i mas gat bikpela save na ekspiriens long ol dispela hap. Wanpela opisa ol i makim em long kamap Klak i mas wok insait long Haus na i bin wok long tebol long pela taim.

Olsem speselis long ol lo long Palamen prosiding na prektis, Klak i save gat wok olsem het bilong Dipatmen bilong Nesenel Palamen. Palamen i gat olsem 300 wokman na meri i save wok long givim sevis long Spika na ol memba bilong Haus. Klak i save lukautim palamen dipatmen aninit long lukaut bilong Spika na wan kain olsem olseketeri (sifeksekutiv) long ol gavman dipatmen i save lukautim ol dipatmen aninit long ol stet Minista.

Opis bilong Klak i gat stat bilong em long taim bilong Englis Palamen. Dispela taitel ‘Klak’ i bin makim wanpela lain husat i ken rit na rait, we i no bin bikpela skil pastaim. Namba wan rekot bilong klak long Haus ov Komons i bin kamap long 1363. Klak bilong Palamen em i Konstitusenel opisa we Nesenel Eksekutiv Kaunsil i makim emtaim ol Komiti long Palamen i givim tokorait olsem em i stap olsem 6-pela yia. Long neks atikel bai mi toktok long wok bilong Sajen-Et-Ams.

Lukim web sait bilong mipela long www.parliament.gov.pg bilong lukim moa wok bilong Palamen Komiti, stori bilong wan wan Memba, ol wok bilong kamapim lo, ol wok bilong semba, enuel palamen pefomens ripot na planti moa. Long save moa long Memba bilong yu na ol gutpela wok bilong em, salim teks wantaim namba wan nem na las nem bilong em i go long telepon namba 70000300. Sapos yu laik save moa long ol sistem bilong palamen na we bilong wok, salim email i go long speaker@parliament.gov.pg o Ring long Sivik na EdukesenMenesa, Sarufa Haro long Ph: 3277448 o email: civiceducation@parliament.gov.pg



CPL kamapim meri lida trening program

Frieda Sila Kana i raitim

CITY Pharmacy Limited, wanpela kampani we i save strongim tumas wok bilong kamapim nem bilong ol meri long komyuniti i go pas long soim piksa bilong wanpela praivet kampani i strongim wok bilong ol meri long kisim lidasip insait long wok ples.

Long Fraide 6 Mas, CPL i makim Intenese Wimens de, ol i bin opim “Wimen Lidasip” program bilong ol long Grand Papua Hotel long Pot Mosbi siti. Planti ol wokmeri bilong CPL Grup kampani wantaim sampela narapela lain long midia na narapela kampani i bin kamap long lukim.

Long strongim dispela bikpela tingting bilong Wimen Lidasip Program ol i bin askim Dame Carol Kidu, husat i wanpela bod memba bilong CPL Grup na Faunda bilong CK Konsaltensi i wanpela spika long dispela bung. Narapela tupela meri husat i bin toktok tu long strongim tingting bilong ol meri kisim lidasip posisen, em Mis Lesielie Taviri, Sif Eksekutiv Opisa (CEO) bilong Origin Energy na Siameri bilong Business Coalition for Women.

Dame Carol Kidu i tok sapos ol meri i gat gutpela man long sapatim ol insait long haus bilong ol em ol i ken mekim bikpela wok lidasip long kampani, gavman na komyuniti. “Ol gutpela meri lida i save gat gutpela man long helpim ol,” em i tok.

Em i tok long CPL olsem em i wanpela gutpela kampani i gat gutpela pasin bilong gavanens na long strongim wok bilong ol meri. Nau em i lukluk long lidasip na menesmen. Lidasip em wok bilong mekim ol stretpela samting. Na wanem kain samting em i stretpela samting? Selebretim Intenese Wimens De, em i gutpela samting.

“Ol meri i bun baksait bilong sosaiti. Ol meri i lida long olgeta hap, insait long praivet laip na long pablik laip tu. Ol meri long PNG sosaiti i gat strongpela pasin bilong senisim tingting bilong ol man,” em i tok.

“Nau long dispela 21 handet yia taim, ol meri i gat salens long mekim senis insait long ol pablik wok. Mekim ol bikpela meri na ol yangpela pikinini meri long ol i mas senisim pasin bilong ol pipel long pablik wok,” Dame Carol i tok.

Lesieli Taviri husat i bin kisim 2014 Westpac Woman of the Year awod, i tok, olgeta meri i lida bikos long haus em ol meri i lida. Ol meri i save mekim samting i kamap bikos ol i save mekim ol ples bilong wok i kamap gut we olgeta lain i save amamas long wok.

Mis Taviri i tok, pasin bilong kamap lida em meri i mas gat pasin bilong daunim em yet long lainim pasin na tingting bilong ol man.

“Mi kisim dispela posisen i no long strong bilong mi yet. No gat. Ol wanwok bilong mi, olgeta man tasol ol i askim mi long kisim dispela CEO posisen. Bilong wanem mi save harim ol na stap wantaim ol. Yu laikim ol man i rispekim yu, em yu mas wokim wankain tu,” em i tok.

Mis Taviri i tok em i ting olsem, sapos yumi laik senisim pasin kalsa bilong yumi nau, em i mas stat wantaim ol mama long skulim ol pikinini meri long strong long kisim lidasip posisen long laip.

“Yu mas no ken tru luk daun long yu yet na tok, yu no inap long kamap wanpela strongpela na gutpela lida,” em i tok.



Yut, Meri na Famili

Pastor
Barbara Lunge

God i belhat long pasin pamuk

Belhat bilong God long tok orait long pasin pamuk aninit long lo. Rom 1:18 “Yumi save, God i stap long heven na em i kamapim ples klia belhat bilong en. Em i bekim pe nogut long olgeta man i givim baksait long em na i mekim pasin nogut. Long dispela pasin no gut bilong ol, ol i wok long daunim tok i tru.”

“...Ol i givim baksait long God, olsem na God i lusim ol i stap long ol dotipela pasin nogut bilon gol yet. Ol meri bilong ol ol i lusim stretpela pasin bilong marit, na ol i bihainim pasin i no stret. Na ol man tu ol i lusim stretpela pasin bilong marit, nab el bilong ol i kirap olsem paia, na ol i mekim pasin nogut wantiam ol arapela man. Ol man i mekim ol dispela pasin i gat sem, olsem na ol yet i kisim pe nogut inap long bekim dispela pasin nogut bilong ol.” Rom 1:26,27.

Yumi ol lida bilong PNG i mas tingting gut na bihainim gutpela tingting bilong God olsem wanpela Kristen kantri long mekim gutpela disisen.

Rom 2:5 Yu pasim tru bel bilong yu nay u no save tanim bel. Na long dispela pasin i olsem yu hipim bikpela pe nogut bilon gyu yet. Na long de God i mekim stretpela kot bilong en, belhat bilong en bai i kamap pels klia na bai yu kisim dispela pe nogut.”

Wanem samting yu planti em tasol bai yu kamautim. Insait long buk Gutpela Sindaun 14:34 i tok, Sapos ol manmeri i bihainim stretpela pasin, bai kantri i gat biknem. Tasol sapos ol i mekim sin, bai ol i sem moa yet.”

Ol man bilong PNG husat i gat gutpela tingting i mas kirap na toktok makim ol pipel. Ol tingting na pasin bilong ausait lain bai bagarapim yumi na bringim belhat bilong God. Dispela yangpela kantri bilong yumi PNG nau i kisim karamap bilong God.

Pastaim Prait Minista bilong yumi i bin sainim wanpela tok promis long stap aninit long God bilong Israel. I gat planti Kristen i wok long pre na han bilong God i stap antap long gutpela lida bilong yumi husat bai sanap na daunim pasin nogut bilong aigris na pasin pamuk long kam insait.

Toksave: Sapos yu i gat wari, o bel hevi yu ken ring long fon namba 70995378. O salim email long: lungeb37@gmail.com



PIH Saveman Nius

"I kam long Pacific International Hospital Port Moresby"

Hepatitis B Disease is one silent killer

By Doctor Jonathan Obefias

NO clear symptoms. No telltale warning signs. No throbbing pain, or whatever that might give you an indicator you need help.

And yet, if left untreated (with some cases showing it was undetected in the patient for 20 years or so before being diagnosed as such), this disease can damage that vital organ: the liver. This disease can cause liver failure and liver cancer.


This is the Hepatitis B disease, which is caused by a virus, also called the "Hepatitis B virus".

Viral Hepatitis is the leading cause of liver cancer. And liver cancer is the second biggest cancer killer. Liver cancer is notorious for being a cancer that is very difficult to get rid of or to be cured fully from. There are some who say that getting diagnosed with a mature stage liver cancer is almost akin to being given the death sentence.

Hepatitis B is spread when someone comes in contact with blood from a person who has the disease. According to the Center for Disease Control & Prevention of the U.S. Dept. of Health, "...most people born in China and other Asian countries who have Hepatitis B were infected as infants or as young children... Hepatitis B can be passed from an infected mother to her baby at birth or from a family member to young children. People living with someone who has Hepatitis B are more likely to get the disease."

However, take note that Hepatitis B is NOT spread through breastfeeding, hugging, kissing, holding hands, coughing or sneezing. And according to the CDC pamphlet, it is also not accurate and misleading, the notion that one can get Hepatitis B from sharing meals, bowls or utensils with someone who has the disease. In some countries this erroneous urban myth has led a few people to have the habit of always bringing their own plastic utensils whenever they go to a restaurant,

Hepatitis B Virus



and they refuse to use the spoons and forks of the restaurant. Even if they did so, it does not mean it leads to them getting Hepatitis B virus.

Hepatitis B is transmitted primarily by body fluids, especially serum. It could also be spread by sexual intercourse. The virus is transmitted through contact with the blood or other body fluids of an infected person. The Hepatitis B virus (HBV) is a member of the hepadnavirus family.

More than 780,000 people worldwide die every year due to consequences of Hepatitis B.

There is no special diet or some behavior set that will act like a preventative to shield one better from the Hepatitis-B virus.

The good news is that there is actually a vaccine. The Hepatitis B vaccine protects people who have never had Hepatitis B from getting it. Any family member of people with Hepatitis B should also get the vaccine. For adults, the vaccine is three shots given over six months. Though in the USA and many other countries, all babies born get the vaccine, what can be done in PNG?

Given that there are surely many adults in the country who have not been vaccinated, the first thing is to know what diagnosis could be done.

At the new PIH, using state of the art Chemiluminiscent Microparticle Immunoassay (CMIA), the initial tests that will be available will be: 1. Complete Hepatitis B Profile test (HBsAg, Anti-HBs, Anti-HBc, HBeAg, Anti-HBe); 2. Hepatitis A IgM; 3. Hepatitis C antibody (HCV).

This would at least make one certain if a family member might have Hepatitis B or not. Those especially with family members who have been diagnosed with liver problems should try to get tested.

I would like to emphasize that the diagnosis of Hepatitis B requires laboratory test confirmation. In PIH we have state of the art machines that can, not only do hepatitis Screening, but also offer the Hepatitis profile, which can detect whether or not a person is immune, infectious or a carrier of the disease.

To doctors all over PNG, please be available of laboratory tests available at Pacific International Hospital

Other Tests using the Chemiluminiscent Microparticle Immunoassay (CMIA):

- Thyroid Function Tests
- Toxoplasma Serology
- HIV 1/2 Duol (4th Generation)
- Syphilis TP



Other new laboratory tests:

- ACT Kaolin
- Adenovirus/Rotavirus
- Screen (Stool)
- B-Type Natriuretic Peptide (BNP)
- C-Reactive Protein
- Crystatin C
- D-Dimer
- High Sensitivity C-Reactive Protein
- Magnesium

- PT/APTT
- PTT mixing studies
- Salmonella Typhi IgM/IgG
- Troponin-I Quantitative

Feel free to email Dr. Jonathan Obefias, pathologist of PIH, on dr-jonathanpih@gmail.com, or text the PIH Textline on 7155-8866

If you want more information on Hepatitis B disease you can also go to the following website: cdc.gov/knowhepatitisB; hepbunited.org

- Antenatal package
- Labour & delivery package
- Laparoscopic 'keyhole' surgery
- Well woman and baby clinic
- Neonatal intensive care

Get ready to deliver your next baby at the luxurious labor & delivery suite at the new PIH !



3 Mile Hill, Taurama Rd, Port Moresby * Call 311-3000 or 323-4400 or text 7155-8866 or email: pihopd@gmail.com

Wan wan man i mas kamapim senis

SENIS i kam yet long wan wan man na fri long mekim dispela senis em yet i ken kamapim senis, Catholic Reporter Edita, Pater Giorgio Licini i tok.

Antap long dispela, Pater Giorgio i tok gupela stia bilong papamama, gupela edukesen, helti pren pasin, komyuniti sevis, tingim na strongim lotu i ken kisim tingting bilong ol yangpela long senis.

Pater Giorgio i mekim dispela toktok bihain long ol ripot i bin kamap long "Google", wanpela intanet sevis we i tok PNG i kisim nem nogut long wol olsem top kantri we pipel i save harim, lukim na ritim ol buk, muvi na piksa nogut.

Pater Giorgio i tok long wankain taim, bisnis long wokim pasin pamuk long PNG nau i wok long go antap.

Ol ripot i kamaut long nius i soim olsem ol i wok long kisim ol ovasis pamuk meri i kam insait long PNG.

Em i tok tu olsem long mun Novemba las yia, wanpela mama na tisa long wanpela skul insait long Nesenel Kapitel Distrik i wok long tokim em long long wanpela sekonderi skul we ol manki i save boda, bai ol mobail fon i no inap isi long nait we sampela yangpela i painim

ol kain kain samting long intanet.

Pater Giorgio i tok em i no isi long wokim lo long putim tambu, o blokim ol websait.

"Ofa i bikipela tumas long ol strit na intanet, na em i isi long painim rot long abrusim ol tambu. Na bikipela salens i stap bikos pipel i lukim olsem i gat moa intres long painim ol samting i tambu," Pater Giorgio i tok.

"Senis i kam yet long wan wan man na fri long mekim dispela senis em yet i ken kamapim senis.

Antap long dispela, gupela stia bilong papamama, gupela edukesen, helti pren pasin, komyuniti sevis, tingim na strongim lotu i ken kisim tingting bilong ol yangpela long senis," Pater Giorgio i tok.

Em i tok laik long lukim ol piksa nogut, o ritim ol buk nogut i no hevi bilong ol yangpela tasol, nogat. Ol bikipela man tu.

"Hevi i no bilong ol yut tasol, nogat. Ekskius bilong ol yangpela em ol i laik lukim na ritim ol nupela samting na ol i kisim amamas long dispela. Tasol ol bikipela papamama, ol skul, komyuniti,

politisen na ol sios lida? Planti taim ol i mekim seksualiti olsem wanpela samting nating. Tasol em i samting we yumi mas lukim olsem rot bilong skruim wok bilong kriesen bilong Papa God.

Dispela i givim moa hevi tu long famili laip, na i save kamap planti taim," Pater Giorgio i tok.

Em i tok ating i moabeta long givim mekimsave i go long ol lain i save promotim, mekim o kisim mani long pasin pamuk.

"I gat bikipela nid tu long skulim ol yangpela pipel long kontrolim ol filing bilong ol na yusim long wokim ol gupela wok pren na kamapim famili laip. Wokim dispel wantaim laik pasin, pasin bilong stap isi na gupela eksampel," Pater Giorgio i tok.

Long wankain taim, Pater Giorgio i tok em i gupela long lukim planti yangpela pipel i lukaitm gut meri na famili bilong ol bihain long ol i pinisim skul.

Na i no long lukim ol i bagarapim laip bilong ol taim ol i raun wantaim ok kain patna, raun nabaut long strit o kamap ol intanet edik o yusim bikipela taim bilong ol long intanet.



Rispektim God na man

LONG Sande namba tri bilong Len, 8 Mas 2015, mi statim homili o tok stia bilong mi wantaim stori bilong mi yet mi raitim insait long MEMORI BUK BILONG MI long mekim wok pris inap long 25 krismas i go pinis.

Mi raitim wanpela eksperiens bilong mi taim mi stap long haikul long yia 1973 we mi wokim namba wan yia bilong mi long haikul. Tasol 4-pela mun bihain mi lusim skul na raun raun wantaim ol mangi bilong ples inap long 4-pela mun.

Inap long mun Ogas 1973, wanpela moning tru, taim mi kirap na laik kisim bus naip na wokabout i go raun. Papa bilong mi i stopim mi na askim; "Paul, yu bai go bek long skul o yu laik stap kanaka olsem nau? Sapos yu no go bek long skul, kaunsil bai putim nem bilong yu long lista bai yu baim takis i go long stet olgeta yia."

Taim mi harim em i tok bai mi baim takis, mi stop na sanap. Olsem wanem? Bai mi kisim mani we? Bikos long dispela taim, mani i no planti olsem nau.

Em i hat tru long ol manmeri bilong ples long kisim mani.

Olsem na mi tingting planti na mi lusim bus naip na go bek long rum, bungim olgeta buk bilong mi na go bek long skul.

Taim mi kamap long skul mi go stret long klasrum bilong mi. Mi no givim ripot long hetmasta tu. Stat long dispela de, mi stadi hat tru olsem na nau mi kamap Pater.

Long Sande 8 Mas 2015, mipela i bin ritim buk bilong Eksodus 20: 1-17, stori bilong God i givim 10-pela mandato o komanmen i go long Moses, na Moses i bringim i go long pipel bilong Israel. Long namba 1 – 4 bilong mandato, God i askim Israel long soim rispek bilong ol i go long em na Papa mama bilong yumi, olsem rep bilong God insait long famili.

Long namba 6 – 10: God i askim Israel long soim rispek bilong ol long narapela manmeri na ol property samting bilong ol. God i no givim 10-pela mandato bilong bagarapim pipel bilong Israel. Nogat. Em i laikim ol, olsem na em i laik ol i stap gut na amamas. Sapos ol bihainim gut lo bilong em, bai no gat hevi o trabel i kamap.

Yumi save, sampela i harim na bihainim lo bilong God. Ol i stap amamas na kamap gut inap long promis len. Ol bihet lain i kisim bagarap planti tru.

Tenpela mandato bilong God i stap insait long Sios bilong yumi yet. Em i no lo bilong helpim Israel tasol. Nogat. Em i bilong helpim yumi nau tu.

Sapos mi no harim na bihainim tok bilong Papa bilong mi, tude mi no stap Pater. Sapos mi go long skul na i no soim rispek bilong mi long God long lotu na bungim em long ol sakramen, o i no soim rispek bilong mi i go long tisa na ol lo bilong skul, mi bilip olsem mi no inap stap tude.

Long yia 2013, mi bin joinim wanpela bung bilong lain Pater SVD long Bangkok, Thailand. Bangkok i no Kristen kantri. Ol i no save long 10-pela lo bilong God. Tasol ol pipel i stap wanbel na amamas. Ol i no pret long wokabout. Bikos ol i gat strongpela rispek i go long King na strongpela rispek long ol propeti bilong narapela.

Yumi stap insait long Kristen kantri Papua Niugini. Yumi gat 10-pela mandato wantaim yumi. Tasol bilong wanem yumi Kristen manmeri stap long PNG i pulap long PRET PASIN? Yumi pret sapos yumi yet i wokabout long Godon market o raun raun long Boroko. Yumi pret long kalap long PMV na kain kain pret i stap.

Bikos manmeri bilong PNG i no soim rispek long narapela manmeri na propeti bilong narapela. Wanem taim bai dispela rispek pasin i kamap strong long Kristen kantri bilong yumi PNG?

Yut Ministri i redim ol pikinini

Veronica Hatutasi i raitim

LAHARA Yut na Pikinini Ministri long Poreporena Yunaitet Sios, Hanuabada Viles klostu long Mosbi Siti i save redim ol yangpela long kamap ol gupela manmeri insait long famili, komyuniti, sios na kantri.

Yut Ministri Kodineta, Bele Heni i tok progrem bilong ol i save kisim ol Sande skul pikinini na tu, kisim ol yut long ol lidasip, kapasiti bilding na spirituel developmen progrem.

Misis Heni i tok dispela ministri i stap insait long sios long planti krismas, taim sios i bin kirap pastaim, na i save helpim planti pikinini long kamap ol gupela manmeri.

"I gat ol lidasip na kapasiti bilding, na sosel na spirituel developmentrening bilong ol yut insait long ministri," Misis Heni i tok.

Ol i save ranim ol man na meri felosip, na yut progrem olgeta wik long ol Mande nait.

Misis Heni i tok felosip progrem grup bilong ol man i nupela, na i bin stat long las yia.

Em i tok ol meri felosip grup i wok long askim ol man long wok wantaim ol long planti krismas, na em i gupela nau long lukim ol man long sios i fomim felosip grup bilong ol, na tuepla man na meri wantaim i ken wok wantaim na ranim sios wok.

Tupela Sande i go pinis, Yunaitet Sios long Poreporena Seket i bin holim Rimembrens de bilong ol pikinini long tingim wanpela pasto na tupela pikinini bilong em husat i bin dai wantaim ol narapela long birua bilong balus long Februeri 6, 1987.

Misis Bele i tok Yut ministri long Lahara na Laurabada i bin hholim kombain sios sevis long dispela Rimembrens de.

Ministri bilong ol pikinini na Sande Skul i save kisim ol liklik krismas bilong ol i stap aninit long 12 yia, taim Yut Ministri i kisim ol yangpela krismas bilong i stap antap long 13 krismas na moa.



Bele Heni, Lahara Yunaitet Sios Yut Ministri Kodineta

Cheshire disAbiliti woksop long Wailaip Asembli`Sios

ASEMBLI bilong God Sios long Wailaip i bin holim wanpela trening progrem we Cheshire disAbiliti Sevis PNG i bin go pas long en.

Long stat bilong las mun i kam inap long pinis bilong em, Cheshire disAbiliti Sevis PNG i bin holim Bisnis trening bilong 26 papamama na ol lain i givim kea i go long ol disebol lain.

Pasto Christopher Kagl bilong Wailaip Asembli bilong God i bin sapotim dispela woksop na ol disebol pipel taim em i larim dispela woksop i kamap long sios bilong em long wanpela mun.

"Sios i larim Cheshire i yusim bilding na ol samting long ranim woksop bikos em i hap long pastorel wok bilong em. Yumi mas givim ol disebol lain wankain sevis na blesing olsem ol narapela man, meri na pikinini," Pasto Christopher i tok.

Joyce Koupere em Cheshire disAbiliti Sevis Progrem opisa i tok dispela em i namnba wan kain woksop ol i holim na em i modol long helpim ol disebol pipel i painim rot long mekim samting long lukautim ol yet, na daunim tarangu pasin. "Cheshire i bin makim 26 papamama

na kea giva namel long planti lain bihain ol inapim ol samting we Self Help Concept Management Group (SHG) i bin laikim long en.

Ol nupela papamama na ol kea giva bai stap long ol sosel grup na givim ol disability awenes na tu, ol bai kisim tren-

ing long besik kaunseling na rihabiltesen, kea na sapot.

Joel Yang, wanpela papa bilong pikinini we progrem i bin helpim na i gat diploma long Maketing long Intenesenel Trening Institut i bin go pas long dispela trening woksop.



DISABILITY WOKSOP: Ol lain papamama i bin sindaun long wanpela mun woksop.

Poto: Cheshire disAbiliti Services

Ol meri PNG i lida bilong planti wok insait long kantri



Long Sande Mas 8, ol meri long wol i makim Intenesel Wimens De. Long sampela hap long PNG tu ol meri i bin bung na tingim dispela spesel de bilong ol. Wanem samting ol i mekim o ol toktok i bin kamap, i bilong strongim ol meri long wok na laip bilong ol insait long kantri.

Ol meri long PNG i winim planti bikipela hevi long kamap lida long kain kain wok, politiks, sios, skul, spot, bisnis na long ples yet. Tude ol meri mekim wok we bipo ol man tasol i save mekim. Ol meri PNG em ol meri bilong wok na ol i laik lainim planti moa nupela samting sapos ol i gat sans. Edukesen em wanpela rot bilong opim tingting na kirapim laik long skruim save i go moa yet, na tude i gat planti pikinini meri i go skul.

Tasol i gat planti hevi i save pasim rot bilong ol meri long soim trupela kala bilong ol na sanap wantaim ol man long developim kantri bilong yumi. Pasin bilong paitim na bagarapim meri o jenda vailens, em wanpela bikipela hevi. I gat ol lo i stap nau long helpim ol meri tasol dispela pasin i no pinis.

Wanpela hevi ol lapun na yangpela meri i wok long bungim nau em ol man i sutim tok long ol long mekim posin na sanguma na ol i kilim ol dispela meri. I bin gat bikipela protes i kamap long PNG yet na long sampela ovasis kantri long taim nius i kamap long ol man i kukim indai wanpela meri long Hagen las yia. Ol i bin sutim tok long em i wokim posin na kilim narapela man. Tude, moa long wan yia bihain long indai bilong em, ol polis i no holim na sasim yet ol man

husat i mekim dispela trabel.

Plantu kastam na pasin bilong yumi i save putim ol meri long baksait na ol pikinini man i go pas. Mekim olsem na ol meri i no gat sans long go long skul o painim wok o amamas na bihainim laik bilong ol olsem ol pikinini man. Mekim olsem na planti taim ol man i save lukdaun yet long ol meri. Ol i lukim papamama i mekim olsem na ol tu i bihainim bikos ol i bilip pikinini man i moa impoten long pikinini meri.

Tude yumi lukim dispela kain pasin long olgeta hap. Long PMV bas, ol man i no inap kirap na givim sit long meri i sindaun, nogat. Long stua ol man bai kam sakim meri i go na subim mani long pes bilong stuakipa long sevim ol pastaim. Dispela pasin bilong 'strong bilong man', i stap

strong yet. I no gat rispek long ol arapela lain.

Wanem taim bai yumi lukim senis i kamap na man nameri i ken sanap wantaim na i no aninit long wanpela o antap long wanpela?

Yumi gat planti ol gutpela man husat i helpim long senisim pasin bilong yumi long mekim PNG i kamap wanpela kantri we ol meri na man i gat wankain sans long mekim wanem samting ol inap long mekim. Ol dispela man i sapotim wok bilong rausim ol pasin nogut i save kamap long ol meri. Yumi luksave long dispela na tok tenk yu long ol.

Laip long PNG i senis na yumi bihainim planti pasin bilong ol ovasis kantri. Sampela i gutpela, sampela i gat kwesten mak long ol na sampela i kisim ples bilong ol pasin tumbuna nau. Tasol pasin

bilong strongim ol meri bai i kamap sapos yumi skulim ol pikinini long luksave long taim ol i liklik yet. Pikinini man na meri i mas kisim wankain skel, no ken putim pikinini man i go pas na meri kam bihain. Planti ol mama i save mekim dispela kain pasin yet.

Sapos yumi skulim pikinini pasin bilong soim rispek, givim wankain sans long pikinini meri na soim laikim pasin long tupela wantaim na bai yumi lukim senis i kamap long tingting na pasin bilong ol taim ol i kamap bikipela. Long skul tu, ol tisa i mas strongim dispela pasin bilong soim rispek na givim wankain sans long ol meri studen. Edukesen i as bilong kamapim gutpela tingting na senisim pasin long kamap ol gutpela sitisen bilong kantri nau na long taim bihain.

Yangpela PNG meri senisim tingting



Poto: Rose Guna

Frieda Sila Kana i raitim

ROSE Guna em i tim lida bilong Human Risos na Edministresen insait long Hadwea Haus long Stimsip Hadwea kompaun long Pot Mosbi. Em i gat 5-pela lain wokman na wokmeri long perol na edmin i wok aninit long lidasip bilong en. Em i bin stap long witnesim lonsim bilong CPL Women in Lidasip Program long Grand Papua Hotel long las wik Fraide.

Dispela meri i tok em i no harim yet long wanem kain we, City Pharmacy Limited (CPL) Grup i laik ranim dispela program bilong Lidasip. Tasol em i amamas long dispela samting CPL i wokim bikos em i helpim ol meri long senisim tingting na i no ken mekim wankain pasin olsem bipo.

"Mipela ol yangpela meri i mas soim olsem mipela i gat save na we bilong stap olsem lida insait long komyuniti tude. Pasin bilong mipela long wok i wok long senis. Nau em i no ol man tasol i save kisim lidasip posisen tasol ol meri tu i wok long kam antap long dispela eria. Olsem na CPL i mekim gutpela samting long rait taim stret. Em i laik strongim ol man na meri

long kirap na mekim wok wantaim," Mis Guna i tok.

Plantu wok bilong CPL i save helpim ol meri, olsem na i gutpela long dispela kampani i mas gat wanpela meri long kamap het bilong kampani.

"Nau insait long CPL Grup em i gat moa meri i wok long lidasip na long olgeta eria bilong wok. Olsem na visen bilong mi em long wanpela meri mas kisim wok bilong CEO we nau wanpela man i holim. Mi no wari sapos em i bilong PNG o bilong narapela kantri, tasol em bai wanpela meri," Mis Guna i tok.

Em i tok bilong wanem Stop n Sop i save salim ol kaikai na ol narapela samting bilong haus, olsem na em i gat moa mining sapos wanpela meri i kamap Sif Eksektiv Opisa bilong kampani.

Mis Guna i tok moa olsem olgeta yia taim CPL i save holim enual menesa konprens long Septemba, em i save lukim ol meri menesa i save kisim moa awod long ol gutpela wok ol i mekim. Olsem na em i tok bai em i no kirap nogut sapos klostu taim, wanpela meri bai kamap kisim wok olsem CEO bilong dispela kampani.

Rose Guna em i wanpela mama i gat tripela pikinini meri, krismas bilong ol 4 yia, 2 yia na 7 mun.



Published Weekly, Thursday, for
Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia. 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at
Able Building
Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service	
6am - 7am	6080; 7240(KHZ)
7pm - 9pm	5995; 6020; 9710; 1280(KHZ)



Piksa bilong ol Saut Si Ailanda ol i bin bringim kam long wok long ol plantessin long Australia. *Poto: ABC*

Vanuatu na Solomon i painim ol tubuna long Australia

Plantu wok i gohet nau long Vanuatu na Solomon Ailan long painim ol pipel bilong ol husat i bin go wok long ol plantessin long Australia long taim bipo.

Profesa Clive Moore bilong Australia na Pasifik Histori long Queensland University i tok samting olsem 62 tausen pipel, planti bilong ol i kam long Vanuatu na Solomon Ailan, na sampela bilong Nu Kaledonia na PNG, i bin go long Australia.

Ol i bin kisim ol dispel pipel i go long taim bilong Blackbirding namel long 1863 na 1904.

Profesa Moore i tok Vanuatu i go pas long painim ol pipel bilong ol em ol tubuna bilong ol long i bin go long Australia.

Profesa Moore i tok ol i gat ol asosiesen we i wok gut na gavman tu i givim bikipela sapot long ol. Em i tok Vanuatu gavman i bin kamapim pinis tu dual sitisensip wantaim Australia aninit long dispela wok.

Tasol em i tok Solomon Ailan i isi tumas long kamapim wanpela asosiesen bilong painim ol pipel bilong ol long Australia.

Profesa Moore i tok nau Solomon Ailan i wok long kamapim wanpela asosiesen long mekim ol dispela wok.

Hevi bilong sapotim Wes Papua i stap long ol MSG lida

Lida bilong Free West Papua Movement long Solomon Ailan, Ian Roni i tok hevi bilong sapotim Wes Papua i kamap memba bilong Melanesian Spearhead Group em i no long Indonesia, em kamap namel long ol MSG kantri yet.

Mista Roni i bin toktok wantaim ABC na em i tok ol lida bilong MSG i no bin wok-bung long membasip na ol hevi bilong ol pipel bilong Wes Papua.

Em i autim dispela toktok long wankain taim ol luksave long ol hevi na wok bilong sapotim dispela Free West Papua muvmen i wok long kamap moa long Solomon Ailan.

Ian Roni husat i wanpela biknem musik man tu long Solomon Ailan i tok, namba wan wok bilong ol em long mekim gavman i sapotim Wes Papua i kamap memba bilong Melanesian Spearhead Group.

Mista Roni i tok sampela memba bilong MSG i bin tokaut pinis long sapot bilong ol long Wes Papua i kamap memba, tasol i no gat wanpela toktok i kamaul yet long gavman bilong Solomon Ailan.

Ol pikinini meri i pilai ragbi lig long PNG

Plantu pikinini meri long Papua Niugini nau i gat laik long pilai long Nesenel Ragbi Lig (NRL) long Dispela laik i kamap long program bilong Australian National Rugby League long helpim ol dispela pikinini meri long pilai ragbi.

Mark Mom, In-country Menesa bilong NRL PNG i tok ol i kolim dispela program, Lig Bilong Laip we plantu tausen ol skul pikinini i save lainim na pilai ragbi long wankain taim em ol i skul.

Gavman bilong Papua Niugini na gavman bilong Australia i wok bung wantaim NRL PNG long bringim dispela program i go long ol skul long helpim ol pikinini i skul gut.

Mista Mom i tok narapela as tingting bilong dispela program em bilong strongim ol yangpela pipel long kamap olsem ol gutpela sitisen.

Em i tok ol i amamas long lukim ol i no ol yanpela pikinini boi tasol, ol pikinini meri tu i gat laik long dispela program na long pilai ragbi lig.

Solomon Ailan i gat gutpela tul bilong abrusim birua ples

Ol atoriti i ken nau lukim long mep olgeta hap graun long Solomon Ailan we i gutpela o bai bungim hevi long en sapos developmen i kamap long en.

Ol envairomen, plening na developmen atoroti long Solomon Ailan nau i gat wanpela kain tul long ol i ken yusim long



Poto i soim kain ples na haus yu ken painim long hailans rijon we ol birua na bagarap bilong bikipela ren na win i kamap long en. *Poto: ABC*

abrusim developmen long ol ples we i ken bungim bagarap.

Dispela tul ol i kolim Geographic Information System or G-I-S mep i soim ol eria we bai tait wara, solwara, graun i bruk na arapela samting i ken bagarapim.

UNDP, Live and Learn na gavman bilong Australia nau i helpim long kamapim i wok long en wantaim Ministri bilong Envaromen long Solomon Ailan.

UNDP Konsalten bilong dispela program, Brian Pitakia i tok ol i bin statim dispela G-I-S map long Temotuna Guadalcanal provins na nau i karamapim olgeta hap long kantri.

Mista Pitakia i tok dispela mep i gat piksa na i soim plantu infomesen long olgeta komyuniti long Solomon Ailan.

O'Neill i go lukluk long ples i bungim birua long Hailans

Praim Minista, Peter O'Neill i bin go lukluk raun long olgeta hap bilong Hailans rijon we ol hevi bilong tait wara na graun i bruk i bin kamap bihain long bikipela ren.

Bikipela ren, na tait i wok long kamapim bikipela hevi long plantu provins long Hailans rijon.

I kam inap nau mak bilong ol pipel i dai em i stap yet long 7, na sampela i bin kisim bagarap i stap long haus sik.

Praim Minista Peter O'Neill i go raun nau long sampela hap long lukim ol hevi ol pipel i bungim nau.

Tait wara i bagarapim ol haus na gaden kaikai bilong plantu pipel long ol dispela eria. kamap. Ais i bin pundaun na karamapim sampela ples.

Kalabusman i helpim Wimen in Egrikalsa

Wanpela kalabusman i helpim dispela PNG Wimen in Egrikalsa grup long kisim wanpela kar i kam long Praim Minista Peter O'Neill bilong helpim ol long mekim wok bilong ol.

Praim Minista O'Neill i givim wanpela kar i go long PNG Wimen in Egrikalsa bihain

long wanpela kalabusman i bin askim. Stori i go olsem, wanpela yangpela man bilong Morobe provins i bin skul long University bilong Technology, tasol papa na mama i no bin gat mani long baim skul fi, na em i bin lusim skul na kamap olsem wanpela raskal.

Em i bin go na stilim mani long benk na em i go kalabus.

Tasol jastis sistem i larim em long skul yet na em i bin askim Women in Egrikalsa long helpim em i mekim tripela mun wok eksperiens wantaim ol.

Taim em i bin wok wantaim ol, emi bin raitim wanpela askim o proposal i go long Praim Minista long givim wanpela wok kar i go long PNG Wimen in Egrikalsa.

Long Fraide 6 Mas, dispela grup bai kisim nupela kar bilong ol na Praim Minista yet i givim dispela kar long wik bihain.

Oposisen Politikal Pati joinim gavman

People's Alliance Party bilong Solomon Ailan i lusim Oposisen na joinim gavman bilong Praim Minista Sogavare.

Presiden bilong People's Alliance Party na gavana jeneral bipo, Sir Nathaniel Waena i toktok wantaim Sam Seke bilong ABC long dispela senis.

People's Alliance Party i lusim Oposisen na i joinim ol politikal pati insait long Democratic Coalition for Change gavman.

Alliance Party i bin sait wantaim grup long Oposisen pastaim long ileksen bilong Praim Minista long Desemba 2014.

Tasol ol 4-pela memba bilong pati i bin go na kamap minista long gavman bilong Praim Minista Manasseh Sogavare.

Politikal Parties Integriti lo i tok pati i mas givim wanpela mun notis, pastaim long em i ken joinim narapela grup.

Presiden bilong People's Alliance Party na gavana jeneral bipo, Sir Nathaniel Waena i tok ol i givim pinis dispela notis.

Sir Nathaniel i tok ol i sainim wanpela kolisen agrimen wantaim ol grup insait long dispela Democratic Coalition for Change (DCC) gavman.

Moa yangpela bai kamap yau pas ...wantaim bikpela nois long musik

MOA long 1 bilien yangpela pipel inap kamap yau pas long harim ol “loud” musik o bikpela nois, Wol Helt Ogenaisesen (WHO) i putim tok lukaut.

Wanpela stadi bilong WHO i painim olsem klostu hap long ol yangpela pipel namel long 12 inap long 35 krismas, klostu i kamap yau pas bikos long bagarap we “loud” musik i kamapim, maski em long laip konset o putim hetpon na harim musik.

Ripot i tok moabeta dispela 1.1 bilien yangpela pipel i stap long hevi i daunim volium o harim musik long 15 minit insait long wanpela de.

Ripot i tok ol Rock sta olsem Pete Townshend long musik grup Who na Neil Young i bungim hevi long yau pas nau bikos long plasnti yia ol i bin pilai laip.


Tasol nau, ol ekspet o save man i tok em i isi tru long kisim hevi long yau pas long ol nupela masin we nupela teknoloji i kamapim olsem ol MP3 pilaia na ol yau pon i mekim isi long bagarapim ol yau dram bilong ol lain i save laikim tru na harim musik tumas.

Edvais i go long ol yangpela lain i laik harim musik tumas em long “turn it down” o daunim.

“Kisim sampela malolo na stop na save long ol narapela samting i kamap long wol.”

Ol Poto na Stori i kam long intarnet

Poto i soim ol yangpela pipel long wanpela laip konset, tasol putim hetpon na pilaim “loud” musik tu bai bagarapim yau na yu ken kamap yau pas



Raita Dean Koontz na nupela buk bilong em, “SAINT ODD”

Sapos yu wanpela man, meri o pikinini bilong rit, hia em sampela ol nupela buk yu ken painim long intanet na ol sampela buk stoa long Mosbi siti na ol arapela hap bilong kantri.

Planti yangpela i save laikim ol buk bilong raita, Dean Koontz. Sapos Dean Koontz i wanpela fevered raita bilong yu, nupela buk i kamaut nau em, “SAINT ODD”. Sapos yu gat sans long painim dispela buk na ritim, em i gutpela.

Yu ken painim sampela long ol nupela buk long ol buksop long Vision City long Pot Mosbi, Holiday Inn, Gateway na ol arapela bikpela hotel tu long siti.

Olsem Saint Odd”, em Dean Koontz i raitim

Liklik histori bilong Dean Koontz:


Mama i karim em long Everett, Pennsylvania, Amerika long Julai 9, 1945 na em i kolim em Dean Ray Koontz. Em i gat 69 krismas nau.

Pen name o narapela ol nem em i save yusim long ol buk bilong en em, Aaron Wolfe, Brian Coffey, David Axton, Deanna Dwyer, John Hill, K.R. Dwyer, Leigh Nichols, Anthony North, Owen West na Richard Paige.

Wok bilong en em, novelist o buk raita, sot stori raita, skrin raita na poet.

Em i save raitim ol “horror o pret fiksen stori, ol saiens fiksen, ol “thriller na suspense” o ol stori bai pulim intres bilong yu na bai yu no inap lusim buk, tasol yu laik rit moa yet.

Ol sampela buk bilong en em, Odd Thomas, Demon Seed, Watchers, Hideaway, Intensity, Phantoms, The Face of Fear na Lightning .



SECRET HISTORIES em narapela buk i gat ol stori bilong 25 raita i stori long “ Courage o strongpela, Risk o hevi, na Revelation o samtiung i kamap long ples klia.

Go insait long Secret Lives bilong ol 25 raita na ritim ol samting i kamap long laip bilong ol wan wan we i mekim SECRET HISTORIES ol koleksen bilong ol stori bai yu no inap lusim tingting long ol.




Rick Campbell na buk bilong em, “EMPIRE RISING” i narapela nupela buk i stap long ol buksel bilong ol bukstoa yu ken ritim.

Em i stori long presiden bilong Saina na pati seketeri i gat hevi na plen tu wantaim. Hevi em Saina i no gat planti oil na dispela i kamapim hevi long ikonimik gro bilong em.. rit moa na painimaut.


Liklik histori bilong Rick Campbell em, mama i karim em long Cornwall, New York, na em i wanpela pikinini tasol bilong papa i wok long US Eaafos na mama bilong kantri Gemeni. Nau em i stap long Cocoa, Florida wantaim meri bilong em Lyn na tripela pikinini bilong ol.

Em i wok long US Nevi olsem sistems enjinia.



Taim em i klostu pinis long wok, em i tingting planti na raitim buk long samting we em i laikim i kamap strong na tude, em i wanpela raita.

Stori bilong tumbuna



Olsem wanem Kokomo kisim bikpela tit?

Long bipo tru muruk na kokomo i stap olsem gutpela pren tru. Kokomo em i gat liklik tit tasol, na muruk em i gat bikpela tit moa. Orait na wanpela de muruk i wokabaut i go long wanpea gutpela ston na em i lusim tit bilong em na i wasim i stap. Orait em i lukim pren bilong em kokomo em i wokabaut i kam. Na em i tok, “Gut de pren. Yu gutpela pren tru. Yu naispela man.” Na tupela i amamas wantaim na tok pilai, na tok gris, na lap tasol.

Tasol wanpela bikpela tingting i kirap long kokomo na em i ting. “Ating bai mi trikim muruk na kisim bikpela tit bilong em. Long wanem muruk i gat bikpela tit tru na em i save yusim ol long kilim ol man tu taim ol i sutim em.”

Orait na kokomo i tokim muruk, “E pren muruk, ating tit bilong yu i olsem gutpela tamiok. Man, ating mi kisim tit bilong yu na mi go traim katim dispela diwai pastaim.”

Orait na kokomo i kisim tit bilong muruk na i go long as bilong wanpela diwai, na em i wok long katim han bilong dispela diwai. Em i tok “Man, poroman, tamiok bilong yu i gut tru.” Na muruk em i wok long lap tasol i stap. Na em i no ting bai kokomo i stilim tamiok bilong em. Tasol taim Kokomo i kamap pinis long tel bilong diwai em i tokim pren bilong em muruk, “E pren, ating mi laik lusim yu nau.” Tasol muruk i tok, “Orait yu kisim tamiok bilong mi i kam pastaim.” Tasol kokomo i kirap na flai i go antap wantaim tamiok bilong Muruk.

Taim muruk i lukim dispela, man, bel bilong em i kirap nogut tru na me i wok long krai tasol. Orait na em i kisim dispela liklik tamiok o tit bilong kokomo na wok long paitim long ston, na bagarapim tit tru, na em i go. Tasol muruk i sori tru long wanem, kokomo i bin kisim gutpela tit bilong em na karim i go pinis.

Nau yumi ting wanem, pasin bilong kokomo i gutpela? Sori, ating em i no gutpela. Long wanem em i olsem stil tasol. Olsem na ating, planti man long Papua Niugini ol i save mekim olsem. Ol i laik trikim arapela man na stil tu. Kokomo na muruk pastaim tupela i stap olsem gutpela pren tru tasol dispela samting i kamap na tupela i stap olsem birua olgeta.

Em i olsem, bipo yumi stap pren tru bilong God. Tasol pasin nogut i bin kamap long yumi na nau yumi no stap moa pren bilong God. Taim kokomo i kisim tamiok bilong muruk, orait tupela i kamap birua. Olsem tasol taim yumi mekim sin long ai bilong God, yumi kamap birua bilong God. Na nau yumi stap longwe long God pinis. Tasol sapos yumi bilip tru long Jisas Krai, bai em i tekewe sin bilong yumi na bai yumi kamap pren bilong God.

Mantam Yomka i raitim

Raun wantaim Wantok kru ...

Yumi FM PNG musik awod bai kamap long Epril

PNGFM, mama kampani bilong Yumi FM, Nau FM na LegendFM bai kamapim gen Yumi FM PNG Musik Awod bilong dispela yia. Olgeta yia dispela Tok Pisin redio stesen bilong PNGFM i save luksave long ol musik manmeri bilong PNG na Pasifik long redio stesen bilong ol Yumi FM.

Yumi FM save mekim Top 20 kaun daun olgeta Sarere long ol singsing we ol man-

meri save laikim long harim na salim leta olsem rikwes.

Dispela kaun daun i bilong Top 20 long olgeta Sarere em Kasty save lukautim na save long wanem singsing stap antap, na wanem singsing bai mekim nem long musik indastri bilong PNG.

Kaun daun bilong Top 20 na top 100 long pinis bilong yia em redio lejen, late Justin Kili

(JK) i kirapim taim em i wok long Yumi FM long luksave long musik manmeri bilong yumi PNG.

Dispela yia, Yumi FM PNG Musik Awod bai kamap long Epril 18 2015, long Lamana Gold Klap insait long Mosbi.

Total Event kampani bai lukim dispela so long dispela nait na bai lukim tu ol sampela musik manmeri bai pilai long dispela nait.

Tisa meri mekim liklik mani long helpim famili ...Siti laip i hat, i no olsem bipo

Nicky Bernard i raitim

TAUN na siti laip i hat liklik nau na sapos yu gat mani bai yu ken lukautim yu na famili bilong yu long stap long siti o taun.

Laip long Mosbi Siti i wok long go hat na hat tumas long sampela famili, maski man na meri i wok, tasol liklik toea ol i kisim long pei bilong ol i no inap long kisim ol i go long narapela potnait. Sapos man i kisim pe long gavman wik na meri kisim long kampani wik ating bai orait liklik, tasol sapos pe bilong tupela i daunbilo dispela bai hat liklik gen long lukautim famili insait long siti.

Helen Haru Naituk, em i wanpela tisa meri long Bomana Praimeri skul insait long NCD. Em i save lainim ol sumatin long gret 8.

Helen em i hap kas Is Nu Briten na Manus.

Man bilong em i save wok long CS olsem wanpela trena bilong ol nupela rikrut na ol stap yet insait long banis bilong CS long Bomana.

Helen i save mekim liklik infomal maket bilong em long wiken. Em i save karim liklik tebol bilong em na go sidaun long sait bilong rot na salim wara kodiel, ol sof dring, bisket na kiau bilong kakaruk. Dispela liklik mani em i mekim save helpim famili i go inap long pei wik bilong em na man bilong em.

Long 4-pela wiken i go pinis, Helen wantaim ol wanlain bilong em, (ol meri bilong ol CS) i bin mekim gut mani, long wanem, Telikom i kisim NSL soka i go antap long banis bilong ol na pulim ol manmeri long Mosbi Siti husat i save bihain soka i go antap long Bomana.

Helen i tok sampela taim em i save mekim

aigir na salim. Sapos gutpela taim na tupela gem i kamap, dispela aigir kaikai bilong em i save pinis.

Em i tok tu olsem bipo taim i no gat NSL soka pilai antap, em wantaim ol wanlain bilong em i no save mekim mani. Ol i save salim wanem samting ol manmeri na pikinini i save laikim na ol bai salim hariap.

“Nau laip i kamap liklik long Bomana, i no olsem bipo wiken bai no gat nois, na mipela i save kisim bas i go long taun long raun nating long wiken. Tasol nau, wiken bilong mipela i orait na tenkyu long Telikom” Helen i tok.

Helen wantaim ol wanlain bilong em i tok tenkyu long Telikom PNG long kisim NSL soka i go long banis bilong ol long mekim liklik mani na tu, mekim Bomana CS kamap laip long wiken.



Helen Haru i sindaun na amamas long liklik maket bilong em. Long sait liklik pikinini man bilong em, Jules Naituk i save bihainim em long mekim liklik maket bilong mama em laip. Poto Nicky Bernard.




TOKSAVE:

WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/-Word Publishing Company, P O Box 1982, BOROKO, NCD, PNG o email edres : editorial@wantok.com.pg Telepon namba: 3252500.*

Tenkyu

Em nau! Ol pikinini i ken painim rot i go long ples wantaim Wantok kru...

Sudoku



			1	2	5		7
1		3				5	9
	4		3			2	
		1		3			5
4			6		1		8
3				4		6	
		7			3		5
	9	8				1	3
	3		5	1	8		

			8	6			9	4
	4				8			5
9			1		4			8
				4	9	1		6
	9	6				7	8	
5		1	3	6				
2			4		5			1
3				9			6	
	5	7			6	4		

Ansa bilong Sudoku # 85 na # 86 neks isu

3	7	1	9	2	6	4	5	8
8	4	6	3	5	1	7	2	9
5	2	9	4	8	7	3	6	1
4	1	8	6	9	2	5	7	3
6	5	7	8	4	3	1	9	2
9	3	2	7	1	5	6	8	4
1	6	4	2	7	8	9	3	5
7	8	5	1	3	9	2	4	6
2	9	3	5	6	4	8	1	7

9	1	5	7	4	3	6	8	2
8	4	7	2	6	5	3	9	1
6	3	2	8	9	1	5	7	4
7	2	8	5	3	9	1	4	6
3	6	4	1	7	2	9	5	8
1	5	9	6	8	4	2	3	7
2	9	3	4	1	7	8	6	5
5	7	6	3	2	8	4	1	9
4	8	1	9	5	6	7	2	3


Ansa bilong las wik Sudoku # 83 na # 84



- Antap
- 1 Rot em ges bilong LNG bai ran long en
 - 5 Grasnaip
 - 7 I no gat kaikai
 - 9 Intenel Revenu Komisin
 - 13 Lotu
 - 14 Bia bilong PNG
 - 16 Ragbi tim
 - 18 Rot bilong go insait long haus
 - 19 Adorim
 - 20 Susa bilong papa na mama
 - 21 Nesenel Alaiens Pati
 - 22 Dring wantaim suga
 - 24 Mani bilong baim wok
 - 26 I no inap
 - 28 Dipatmen i bosim ol ka
 - 30 Hamas mani stap long akaun
 - 32 Mobail fon i ring na i no gat bekim
 - 33 Institut ov Nesenel Afeas
 - 34 Wanpela diwai
 - 35 Nambawan!
 - 37 LNG
 - 39 Liklik pikinini
 - 41 Givim luksave na glori long God
 - 43 Malolo na raun long narapela kantri
 - 46 Ol samting
 - 48 I no hatwok
 - 50 Kain kain
 - 51 Lotu
 - 52 Wanpela strit long Mosbi siti
 - 53 Holi

- Daunbilo
- 1 Draiva bilong balus
 - 2 Pos Opis
 - 3 Bilong lukluk
 - 4 Lukautim ol sik pipel
 - 5 Ol toktok
 - 6 Wara i kol tru na kamap strong
 - 8 Yu tasol
 - 10 Spit

- 11 Tupela politisen bilong Nu Ailan
- 12 Wanpela benk
- 14 Bilas bilong lek
- 15 Karamap
- 17 Hapsait
- 18 Salens
- 22 Sutlam
- 23 Salim mani kwik long pos opis
- 24 Bilong slipim het
- 25 llektoret bilong nupela Praim Minista
- 26 I save pundaun long ol kol kantri
- 27 Sempian swima bilong PNG
- 29 Makim kendidet
- 30 Binen
- 31 Biktaun long Morobe
- 32 Liklik fon
- 34 Namba faiv mun
- 36 Abus bilong wara
- 38 Bilong wokim kaikai i teist gut
- 39 Tul bilong brukim graun
- 40 Namba faiv mun
- 42 Yu ____ mi
- 43 Em i givim skul
- 44 Baim ples bilong slip
- 45 I no aut
- 46 Ol asua i bringim yu long ai bilong kot
- 47 Epa
- 49 Kaikai ol i wokim long susu



TOKSAVE: Mipela i sori tru long mekim tupela mistek long Painim Wod Pilai bilong las wik. Wanpela long wod lista, mipela i putim MUSIM tasol rait pela wod em YUSUIM. Na narapela i stap insait long bokos bilong ol wod, i stap olsem PEULIM tasol rait pela wod i PAULIM.

Mi gat wari na mi laikim helpim

Sumatin i miksim edukesen wantaim ol drag na alkohol

Dia Laipain,
MI WANPELA sumatin man i gat 18 krismas na mi skul long wanpela nesene! hai skul insait long Nesene! Kapitel Distrik.

Papamama bilong mi i bruk marit na i no moa stap wantaim. Klostu ol bai divos bikos ol i no stap wantaim insait long las 10-pela krismas.

Mi wokim Gret 12 na ol fainol eksam o tes i kam klostu nau. Mi pilim olsem bai mi wokim gut long Gret 12 eksam. Mi save olsem mi ken wokim gut, tasol samting em, mi gat ol wanlain poroman i stap long strit we mi groap wantaim ol.

Long planti yia, i no gat rot long abrusim ol na mipela i save dring wantaim, kaikai buai wantaim na olgeta de, mipela i save lukim wanpela narapela na bung. Maski mi gat planti skul wok, em i hat long mi long abrusim ol o tok no gat long ol.

Narapela wari mi gat em dispela. Ol poro bilong mi ya we mi bin wok bihain long ol i bin pinisim Gret 10 na go long sampela teknikel skul. Taim ol i kisim pe bilong ol, ol i save baim bia long mi.

Mi wari bikos mi mas bekim pasin ol i mekim long baim bia bilong ol.

Mi no gat mani, tasol lans mani we mi kisim long papamama bilong mi tasol.

Long las tupela yia, mi wok long stilim mani bilong mama na susa bilong mi long baim bia bilong ol poroman.

Mi no laik wokim dispela stil pasin, tasol taim ol poroman i singautim mi long dring wantaim ol, mi save wokim dispela asua gen.

Mama na susa i save laik haitim mani bilong ol, tasol taim ol i kam bek long wok, skin bilong ol i save les na ol i save lusim walet bilong ol long ples klia na mi save kisim ol mani long K100 o K200 manim mak.

Laipain, mi no laik wokim dispela pasin moa na plis helpim mi. Mi pilim olsem mi wok long kamap wanpela stilman.



WORRIED STUDENT

Dia Pren,

Tenkyu long serim wari bilong yu wantaim mipela long bihain taim bilong yu we yu gat wari long em bikos papamama i no moa stap wantaim.

Mekim na yu raun wantaim ol mangi na smok dring taim yu sumatin yet.

Mipela i luksave long yu na ol wari yu gat long skul, na bihain taim bilong yu.

Mipela i save kisim ol wankain pas long planti lain insait long kantri bilong yumi.

Mipela i luksave olsem laip em i hat taim papamama i no stap wantaim long sapotim yu long ol samting yu laikim long en.

Mipela i luksave tu olsem tupela papa na mama i mas stap long lukautim na givim stia long ol pikinini long fisikel, spiritual na sosel sait, na ol i ken mekim gut long skul na ol narapela samting long laip bilong ol.

Mipela i luksave olsem i no yu, tasol planti narapela pikinini insait long kantri i gat dispela kain wari we wanpela papa o mama tasol i lukautim ol i stap.

As long ol dispela hevi em i ken pasin bilong ol waitman we mani, gat planti samting na moa o ol narapela samting we ol yet i save long en.

I moabeta yu toktok long papamama bilong yu long ol wari na hevi em bruk marit bilong ol i kamapim, na tokim ol long pilings bilong yu long dispela samting.

Dispela i wok long kamap planti tude na planti yangpela pikinini i bungim hevi long selpis pasin bilong ol papamama husat i tingim ol yet na ol i ting olsem ol i smat na salensim wanpela narapela.

I moabeta yu no wari tumas long dispela samting, tasol yu toktok long papamama bilong yu na ol i ken painim rot long helpim yu.

Ol i laikim yu na putim yu i go long skul, tasol ol i mas sapotim yu. Em i taim nau yu toktok long ol long wokim bel gut pasin namel long ol.

Mipela i bilip olsem taim yupela i sindaun na toktok, bai dispela i givim

yupela sans long rispektim ol yet na luksave olsem ol i marit na ol i gat bikipela pikinini na ol i ken helpim yu, na yupela olgeta i ken amamas olsem famili.

Pren, yu wari long smok na dring raun wantaim ol poroman husat i mekim na yu wok long stil long mama na susa bilong yu. Mipela i tokim yu stret olsem taim yu raun wantaim ol manki ya, bai yu stil yet long mama na susa bilong yu. Na ol bai kisim polis long yu na holim pasim yu.

Yu ken lukim olsem hevi long famili i ken bagarapim skul na bihain taim bilong yu. Na em i ken go no gut sapos yu no harim na bihainim gutpela stia.

I moabeta nau yu abrusim ol dispela poroman bikos dring na smok na i no mekim ol skul wok bai bagarapim yu na bihain taim bilong yu.

Malolo liklik na tingim ol samting mipela i tokim yu long en.

Askim yu yet olsem disisen yu wokim long pas wantaim ol poroman bai kamapim wanem gutpela samting long laip bilong yu, skul na bihain taim.

Stilim mani na dring i kamapim gut laip bilong yu na yu save bungim hevi tu?

I moabeta yu tok tru long yu yet na toktok long papamama o man o meri yu gat luksave long en long helpim yu daunim hevi.

I moabeta yu joinim wanpela yut grup we i strongim ol yut long gat gutpela helti na prodaktiv laip.

Inap yu joinim wanpela sios na yut grup?

Bikipela i laikim yu na gutpela long bihain taim bilong yu, na olsem , trastim em tude.

Proverbs 3: 5,6.

Pren bilong yu, Laipain

Sapos yu gat wari o hevi, rait i kam long dispela etres: Lifeline Counselling Services, P O box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.

Laipain

Tok Pilai wantaim Kanage



Eduketet Kanage...

KANAGE i raun long Boroko na 3 kilok apinun samting, em i kalap long PMV bas na i laik go long Waigani. Em i kalap stret na long dua bilong bas yet, em i lukluk i go long kilok bilong bas long fran winskrin klostu long ria visen mira. Em i laik save wanem taim stret long avinun em i lusim 4 Mail.

Kilok i tok 8:25 pm na hariap tru, Kanage i tanim na tok gut-nait long boskru arere long em. "Gutnait boskru."

Boskru i bekim "Boi, yu mas paul ya." Kanage i tok "Mi eduketed o yu eduketed". Yu wantaim draiva bilong yu i ran long nait ya, na yutupela i no klia yet?" Boskru i tok "Mi les long toktok long paul paul man. Kisim bas pe i kam."

Kanage i tokim em "Yutupela paul paul i stap na kilok bilong yutupela long fran i tokim mipela olgeta olsem yutupela i ran long Mosbi siti long nait."

Side Kona Joe

M.B Hohola

Ai yu Tisisel fujitif...

KANAGE i laik winim mani long Digicel fujitif resis we ol anaunsa bilong Nau FM olgeta moning i wok long givim klu long ol man long painim dispela fugatif ya long Mosbi siti.

Em i harim mani i go antap

Ol skwat!

Salim ol gutpela Kanage tok pilai i kam long: Kanage Tok Pilai

P.O. Box 1982, Boroko, NCD Port Moresby.

Email: jwilson@wantok.com.pg

long K8,000 na em i tingting long painim fugatif long tumora moning.

Neks de, Kanage i kirap long moning yet, stap pinis long 4 Mail wantaim liklik redio long yau bilong em.

Em nau, nius i pinis na anaunsa long Nau FM i givim toksave na long sem taim, em i givim liklik klu na tok olsem 'Look different in the mirror'.

Kanage i harim dispela na em i go na tingting i wok nau. Tingting i go, i go na em tingim em bai long baba sop o long salun bilong katim gras (hair Saloon).

Em i resis long bas stop bilong 4 Mail i go long Ori Lavi haus olsem ol tewel i ranim em.

Kamap stret, ful stop na lukim get ino op yet. Em i tingim Trends hea salun long hapsait i go olsem long strit sin (Street Scene). Em I roket i go kamap long hap na i laik pusim dua long go insait tasol em lukim wanpela man i sanap long kona bilong hea salun.

Em i go klostu na kirap askim, 'Ai yu Tisisel fukatif?

Man ya i kirap no gut na paul wantaim bekim..Husat! Mi ah? Kanage, i no westim taim, em i askim em gen, 'hariap, yu tok, Ai yu Tisisel fukatif?..yes o no?'

Man ya i bekim...hey, husat tif bilong yu, mi nau tasol mi kam long ples ya, yu long long o, yu lukim mi olsem raskol man ha?'

Side Kona Joe

M.B Hohola

Ol raun nabaut poto



LONG SOLWARA TEKSI: Ol yangpela Is Simbu sumatin i go long Logaweng semineri skul.



OL YANGPELA GOLFA: Ol dispela liklik mangi i lain log pilai golf nau i ken kamap ol sempion golp pilaia long tumora.



PAINIM DINA: Klostu nait na yangpela mangi i huk long Buka Pasis solwara long kisim abus bilong nait kaikai.

Winmani bilong Foren eksens long BSP i pundaun

Stanley Nondol i raitim

BIKEPela komesel benk long kantri, Benk Saut Pasifik (BSP) i tokaut olsem reveniu bilong foren eksen i pundaun long 2014 long mani mak bilong K101.5 milien long las 6-pela mun bilong 2014.

Long namba wan hap bilong 2014 reveniu bilong foren risev i bin stap long K184.5 milien tasol long namba tu hap bilong yia reveniu pundaun kam daun long K83 milien.

BSP i tokaut long ripot bilong ful yia risal bilong 2014 long las wik olsem dispela i kamap bihian long sampela senis i kamap long majin bens bilong foren risev.

Praim Minista Peter O'Neill long palamen i tokuat olsem PNG i gat moa long K5.8 bilien long foren risev. Tasol gavman i kontrolim

Mista O'Neill i tok i gat inap mani tasol gavman i no bin putim sampela kontrol na lukim ol komesel benk i save sasim bikipela fi long

treseksen bilong foren karensi treading.

Long wankain taim Gavana bilong Benk bilong Papua Niugini, Loi Bakani i tok kantri i no sot long foren karensi. Em i tok putim foren karensi long wanpela hap bilong benk i no soim olsem kantri i sot long foren karensi.

BSP i tok reveniu bilong grup i go antap long 4 pesen long 2014 na bikipela bilong winmani i kam long intres bilong treseri bil na inscraib stok. Tasol long namba tu hap bilong 2014 i lukim reveniu bilong foren eksens i pundaun i go daun tru.

Long wankain taim, wanpela profesa bilong Australia Nesenel Yunivesiti (ANU) long las wik i tok hevi bilong ikononik bilong PNG bai go bikipela moa sapos politiks i kamap na eksens reit bilong PNG i no kam daun.

Profesa bilong ikononiks na Dairekta bilongng Divelopmen Polisi Senta long ANU, Stephen Howes i tok long wanpela anilis wok i

kamaut long Esia Pasifik Forum na i kamaut long Australian Financial Review.

Profesa Howes i tok sapos wok politiks i go insait long wok bilong Benk bilong PNG na eksens reit i no kam daun, na gavman i no katim daun ekspendis, hevi bilong ikononik bilong PNG bai go bikipela.

Tasol Profesa Howes i tok dispela ripot bilong PNG gavman i kontrolim foren eksens reit na mani hevi bilong kantri bai go het na go bikipela na kantri bai bungim hevi bilong mani.

Em i tok long medium tem intres reit bai go antap na prais bilong ol samting bai go antap na PNG foren eksens risev bai go daun.

Em i tok BPNG i mas larim eksens reit kam daun. Em i tok moa olsem gavman i no ken yusim moa mani o katim daun ekspendis.

Profesa Howes i tok PNG i gavman i bin yusim bikipela mani long las 2 o 3-pela yia long ol winmna i kam insait.

BSP mekim K500m winmani long 2014

BIKEPela komesel benk bilong kantri, Bank South Pacific (BSP) i tokaut olsem em i mekim K507.3 milien winmani long yia 2014 maski ikononik bilong PNG i bin go daun liklik.

Benk long las wik i givim ful fainensel risal bilong 2014 na i tokaut olsem;

- BSP grup i mekim K507.3 milien winmani bilong 2014. Dispela em bihain long benk i baim olgeta takis long gavman. Em i 16.1 pesen moa long winmani bilong 2013 long K436.8 milien. Na total aset bilong kampani i go anap long K15.877 bilien.

- Reveniu bilong BSP Grup go antap long 4 pesen long 2014. Reveniu i gro bikos logng ol inkam strims,

bikipela i kam long treseri bils na inskraib stok. Reveniu long foren eksens i kam daun namba wan hap bilong 2014 long K184.5 milien go daun long K83 milien long pinis bilong 2014. Dispela i kamap bihain long sampela kontrol i kamap long foren eksens.

- Benk i tok diposit bilong kastoma long sait bilong gavman i gro long PNG na kopret diposit i gro long Fiji. Em i tok diposit i gro yet na go antap long 4.1 pesen.

Benk i tok operating ekspens i kam daun long 2014 long K41.7 milien na lukluk strong long rot bilong yusim mani long 2015. Kos bilong benk long 2014 em 46.5 pesen na long 2013 bin 51.7

pesen.

-BSP i tok kepitul beis stap long gutpela mak. Total kepitul long pinis bilong 2014 em 24 pesen na i sanap strong long apim balens sit. Total dividen benk i baim long ol seaholda em K309.14 milien. Benk i tok total resio bilong 24 pesen i abrusim mak Benk bilong Papua Niugini (BPNG) i putim long 12 pesen mak.

Deputi Sif Eksektiv Opis bilong BSP Johnson Kalo i tok long 2014, wantaim sapot bilong PNG gavman, benk i lonsim namba wan Hom Onasip skim dinau. Na kastoma i bungim mak bilong hausing dinau bai kisim benk dinau na mekim long liklik winmani insait long 40 yia.

Madang bai lukautim 2015 Nesenel ERT Salens

James G. Kila i raitim

OL LAIN husat i makim imejensi rispons bilong ol maining na petroleum kampani long PNG i bin go stap long Madang las wik long sekim ol ples na ol fasiliti long wok redi bilong 2015 Nesenel Maining Imejensi Rispons Salens.

Long dispela yia, Ramu NiCo Menesmen (MCC) bai go pas long lukautim dispela nesenel imejensi rispons salens em bai kamap insait long foapela de stat long 22 i go 25 Ogas, 2015.

Ples we dispela salens bai kamap long Madang em Divain Wod Yunivesiti na PNG Maritaim Koles.

Nesenel imejensi salens long dispela yia bai lukim ol tim bilong ol main na petroleum i stap long raitim ol ansa na tu go insait long prektikel eksesa is olsem kilim indai paia, sets na

reskiu, endurens, vetikol reskiu, hazmat na malti kesualti.

Ol ERT tim husat i go long Madang long sekim ol ples we salens bai kamap na ol fasiliti em Oil Search, Morobe Mining Joint Venture, Lihir Gold Main. Tolukuma Main, Fire Rescue South Australia na Mineral Risoses Atoriti (MRA).

Ol spona bilong 2015 Nesenel ERT salens long Madang em Dunlop Tyres (PNG), Newcastle Rescue (Australia), Icom Radios (PNG), Red Earth (Australia), Falck (Australia), Protector Allsafe (Australia) na Fire Rescue South Australia (Australia)

Long las wik Fraide, ol lain bilong Ramu NiCo Menesmen (MCC) na ol opisa bilong PNG Maritaim Koles na Divain Wod Yunivesiti (DWU) i bringim ol lain bilong ol main i go long ol

ples we salens bai kamap long en.

Dispela imejensi rispons salens i save givim ol tim bilong ol maining na petroleum kampani salens long soim ol kain kain save na skil bilong ol long sait long test long reskiu o helpim ol lain i bungim birua. Dispela salens i givim strong long sait long ERT developmen na helpim ol tim long ol samting i kamap long sait long imejensi rispons.

Ol lain deligesen i amamas long ol risoses na ol sapot ol i kisim long Madang na i wetim dispela profesinel salens long 2015.

Ol lain bilong Ramu NiCo (MCC) i amamas long lukautim dispela ERT salens long Madang long namba wan taim tru na i givim tok amamas i go long Sif Inspekta ov Mains long sapot em i givim long indastri long PNG.



Ol lain memba bilong maining na petroleum indastri sekim ol ples bilong ERT salens long PNG Maritaim Koles long Madang.

Petromin lukluk long pasim Tolukuma gol main

Stanley Nondol i raitim

BOT bilong Petromin Holding Limited i lukluk long sampela rot bilong pasim Tolukuma gol main (TGM) long Gollala distrik long Sentral provins.

Dispela toktok i kamap long las wik bihain long bot i holim wanpela miting we ol i toktok long bihain bilong gol main long Tolukuma.

Bot siaman bilong Pteromin Sir Brown Bai i tokaut long wanpela stetmen long las wik olsem bot i mekim dispela disisen bihain

long bot i traim long kisim wanpela gutpela developmen patna long ausait tasol i no gat wanpela i soim laik.

"Operesen kos bilong TGM i antap moa na prais bilong gol i wok long kam daun i wanpela bikipela salens bilong TGM na Petromin i kisim taim liklik long go het wantaim operesen bilong main bikos i no gat inap mani."

"Petromin i lusim bikipela mani long fandim TGM long las 4-pela yia na wantaim na nau prais bilong gol long wol maket i pundaun, Petromin i

no inap long go het na sapotim operesen bilong TGM wantaim mani," Sir Brown Bai i tok.

Em i tok bot i edvaisim menesmen long toktok wantaim ol reguleta na ol stekholda bipo long Petromin bot i mekim fainel disisen.

Mista Bai i tok bot i save pinis long ol hevi bilong reguleteri na Petromin bai bihainim olsem kampani bilong Papua Niugini o kampani bilong gavman. Em i tok Petromin bai bihainim olgeta rot aninit long lo bilong kantri.



3 TIMES A WEEK*

between **PORT MORESBY & HONG KONG**

More connections to Asia & Europe



book now!

Air Niugini

www.airniugini.com.pg

EXCLUSIVE CARRIER FOR THE 2015 PACIFIC GAMES

*Commencing 29th March 2015

Call Toll Free on 180 3444 or contact your nearest

Air Niugini Travel Centre or Travel Agent for further details.



Laisens bilong salim bia bai stop long KBK SML eria

OL LAIN husat i gat laisens long salim bia o lika long Kurumbukari eria long Usino-Bundi i kisim tok-save pinis olsem ol bai ino inap moa salim bia bihain long deit bilong laisens bilong ol i pinis.

Dispela toksave i kam long ekting Provinsal Edministreta na Sif Provinsal Lika Laisensing Komisina, Daniel Alo i insait long wanpela leta i kamaut long Februari 16, 2015.

Mista Alo i tok olsem dispela disisen long stopim laisens bilong ol lain i salim bia i kamap bikos long planti lo na oda hevi i kamap long KBK eria bikos ol man i wok long baim bia long ol botol-sop long ples olsem Banu na long Kinimati.

Banu botol sop i stap long rot i go antap long KBK spesel maining lis na Kinimati i stap antap baksait long KBK main.

Sinia Komyuniti Afes (CA) Dipatmen opisa bilong Ramu NiCo long KBK Main, Greg Tuma long ol wik i go pinis i bin go aut long ol viles na hauslain komyuniti long KBK eria long toksave long ol dispela tambu long salim bia bihainim toksave i kam long lika laisensing komisina bilong provins, Mista Alo i.

KBK eria insait long las tupela mun bilong yia 2014 i bin lukim sampela ol lo na oda hevi i kamap bikos long ol man i spak na kamapim hevi.

Ramu NiCo Menesmen (MCC) i lukim sampela ol propeti bilong en i bagarap long han bilong ol spakman we i kostim planti milien Kina.

Eking Provinsal Edministreta, Mista Alo i insait long leta bilong em i go long Siaman bilong Kurumbukari Lenoa Asosesin (LOA) i givim oda olsem ol lain husat i gat ol stua we i salim lika o bia na ol arapela strongpela dring bai lukim laisens bilong ol i stop bihain long deit bilong laisens i ekspaisa o pinis.

Mista Tuma, husat em wanpela lokal lida long KBK eria na i wok nau wantaim CA Dipatmen long KBK Main, i bin go aut long ol wan wan ples stat long Banu i go olsem long Daunagar, Enekuai na i go olsem long Kinimati long toksave long ol manmeri long oda em Sif Provinsal Lika Laisensing Komisina, Mista Alo i givim.

Mista Tuma i tok dispela oda long stopim treding bilong bia em oda i kam long Provinsal Edministreta na ol lain husat i salim bia na arapela lika i mas harim tok na bihainim.

Suprintenten wantaim Sekuriti Dipatmen long Ramu NiCo KBK Main, Roy Lame i tokaut tu long wanpela ripot bilong em olsem pasin bilong dring bia em as bilong ol lo na oda hevi long ol ples arere long KBK spesel maining lis eria na tu ol ples na hauslain



Ol lain komyuniti bilong Daunagar i harim toktok.

klostu.

Mista Lame i tok olsem insait long sotpela taim em i stat wok antap long KBK em i painimaut olsem i gat tupela stua long Enekuai rilokesen eria i save salim bia. Tasol em i kisim ripot olsem ol lika inspekta bilong Madang i toksave pinis long ol long rausim salens bilong ol stua ya bikos ol i wokim kain bisnis insait long maining lis eria na bisnis ol i wokim i kamapim hevi long sosel sait na gutpela sindaun long eria.

Mista Lame i tok em bai toksave long ol polis long karimaut wok long sekim ol stua na rausim ol bia na lika long ol maining lis eria long KBK.

Em i tok tu olsem em i kisim ripot tu olsem ol yuts i wok long wokim ol yawa o hombruk na salim nabaut na dispela tu bai polis bai sekim. Taim dispela i kamap bai i gat strongpela wok bilong sekim ol kar i kamap long ol sek-point i go olsem long KBK na Butua na tu i go lo SML eria.

Ol lain i karim bia na lain dring bia bai go long han bilong polis long mekim-save long ol aninit long lo.



Pasin bilong amamas mas noken go wantaim bia long selebresen.



Sinia Ramu NiCo CA opisa Greg Tuma givim toktok long Butua.



Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

'Wanpela Ramu NiCo, Wanpela Komyuniti'

Gabadi rais projek i karim kaikai nau

Stanley Nondol i raitim

PAILET rais projek long Gabadi, Kairuku distrik long Sentral provins i lukim namba wan haves we ol i kisim 10,000 kilogram rais long las wik.

Wanpela kampani ol i kolim Village Garden wantaim teknikel helpim bilong Filipins i bin planim Supa Haibrid rais long Novemba las yia.

Ol sid bilong rais i bin kam long Filipins na Village Garden i traim planim long paillet projek bihain long em i kisim teknikel edvais olsem graun long Papua Niugini i gutepla long groim haibrid rais.

Sif Fainensel Opisa bilong Village Garden, Maso Koren i tok kampani i yusim irigesen sistem (yusim wara long helpim rais gro).

Ol i yusim 4-pela wara tenk long putim wara long helpim rais i gro.

Mista Koren i tok kantri i ken groim rais na dispela paillet projek i kamap gut na kampani i lukluk long apim mak bilong rais i go antap moa long narapela haves.

Em i tok kampani yusim K2.6 milien long paillet projek na i no kisim fainensel sapot long gavman.

Minista Richard Maru i tok kampani husait i laik mekim projek long kantri i mas gat inap mani na save long mekim wok.

Minista Maru i tok Village Garden i kisim dinau mani long Nesenel Dvelopmen Benk long mekim paillet haibrid rais projek. Em i tok foren kepitel em wanpela samting gavman i lukluk long en long ol kain projek olsem.

Ol midia tim i bin go kamap long Gabadi long taim bilong namba wan haves long



Trakta brukim graun long Gabadi rais projek.

lukluk long rais projek na toktok wantaim ol eksektiv bilong Village Garden.

Mista Koren i tok kampani bai prosesim rais long Pasifik Adventis Yunivesiti (PAU). Em i tok ol masin na wok samting i kam pinis long Filipins na redi long ol i sanapim na prosesim rais.

Kantri i save kisim moa long 200,000 kilogram rais long wan wan yia long mani mak bilong K500 milien. Populesen bilong kantri i wok long gro long mak bilong 2.6 pesen long wan wan yia, olsem na kantri bai i nidim moa rais long givim kaikai long ol pipel.

Plantim rais projek long kantri i save feil

tasol Village Garden i tok dispela paillet projek bai siom kantri na gavman olsem PNG i ken planim rais na salim long ol pipel.

Mista Koren i tok kampani bai salim rais aninit long bren nem VG rais Na prais bilong em bai daunbilong long ol rais bilong ausait.

Em i tok Haibri rais long Philippines i ken gro long olgeta graun long kantri.

Ol delegesen bilong Philippines na ol bigman bilong NARI na gavman na ol papgraun i bin witnesim namba wan haves long Gabadi na i amamas olsem rais bin gro gut bihian long tri-pela mun.

B-Mobail Vodafon lonsim 3G long Manus

OL PIPEL long Lorengau na Lombrum long Manus bai nau kisim data koneksen bilong 3G netwok long go long intanet sevis.

B-Mobile Vodafon i lonsim 3G long Manus long apgredim sevis bilong intanet long las mun.

Kampani i tok em i bin apgredim netwok pinis long Nesenel Kepital Distrik (NCD), Lae, Mt Hagen, Wewak na Simberi.

B-Mobile Vodafon i tok dispela apgredim bai helpim ol bisnis, visita na ol pipel long Manus long ol bai amamas long yusim hai spid intanet long smatfon.

B-Mobile em 85 pesen bilong PNG gavman na nau i wok long mekim bikpela apgred long ol senta bilong PNG long apim komunikesen sevis.

Vodafon em wanpela bikpela telekomunikesen kampani long wol na i wok patna wantaim BMobile long apim sevis bilong telekomunikesen long kantri na givim gutpela sevis long ol pipel.



B-Mobail tawa long Lombrum

K700,000 bilong Namatanai imejensi kol senta

Stanley Nondol i raitim

NAMATANAI distrik na Digicel bai wok bung long helpim ol pipel i save ran long solwara bilong Nu Ailan na ol arapela ailan long Niugini Ailan rijon long taim bilong imejensi.

Memba bilong Namatanai, Byron Chan na hetman bilong Digicel Colm Breheny i sainim agrimen bilong K700,000 bilong putim kol senta long ol pipel raun long solwara long Namatanai na ol rijon klostu long hap i ken yusim long taim ol i bungim taim nogut.

Husait i ran long solwara long hap bai kolim kol senta long ran bilong ol.

Diistrik Edministreta bilong Namatanai, Robin Brown i tok dispela

sevis bai helpim planti pipel bikos Namatanai i gat planti ailan na planti laip i lus pinis long solwara.

Mista Chan, Mista Brown na Mista Colm Breheny i sainim agrimen long dispela wik long Pot Mosbi.

Mista Brown i tok dispela sevis i kamap bihian long ol pipel bilong Namatanai I askim distrik long kamap wanataim sampela rot long putim was long ol pipel i raun long solwara na bungim hevi bai kisim helpim.

Kol senta bai stap long Mosbi tasol ol bai putim was long husait i raun long solwara long Namatanai long 24 aua long 7-pela de bilong wik.

Dispela sevis bai stat long neks mun.



Distrik Edministreta bilong Namatanai, Robin Brown na Mista Chan i givim K700,00 long Digicel bosman bilong klaut sevis Colm Breheny.

Binatang i stap long rais projek

Stanley Nondol i raitim

OL I painim binatang bilong bagarapim rais long Gabadi paillet haibrid rais projek tasol i gat rot bilong kilim dispela binatang

Ol wokman bilong Nesenel Egrikalsa Kwarantint Inspeksen Atoriti (NAQIA) i bin painim sampela binatang bilong rais ol i kolim rais bag (rice bug) namel long ol haibrid rais, em kampani ol i kolim Village Garden i bin planim long Gabadi, Sentral Provins.

Senia Entomolojis bilong NAQIA,

David Tenakanai wantaim sampela wok man i go lukluk raun long rais projek long dispela wik taim Viles Garden i mekim namba wan haves.

Mista Tenakanai i tok NAQIA i bin mekim (Pest Risk Analysis) o sekim gut ol rais sid i kam long Filipins na i no bin gat binatang.

Em i tok ol sampela binatang ol i painim em bilong PNG yet. Sampela em ol bilong kaikai gras olsem grasopa na rais bag ol i painim em bin stap tasol long gras long Gabadi.

Mista Tenakanai i tok i gat pret olsem rais bag i ken kamap planti

moa na bagarapim rais projek. Tasol em i tok i gat ol marasin stap long yusim long kilim dai ol rais bag. Ol arapela binatang em bilong kaikai lip bilong gras.

Em i tok long 90S grasopa i bin pulap stret long Gabadi na bin bagarapim planti ol gaden lip.

Mista Tenakanai i tok dispela i wok bilong NAQIA long sekim olgeta egrikalsa samting i kam long ovasis nogut bai ol i karim sik i kam insait. Tasol taim NAQIA i sekim rais sid bilong Filipins long tripela mun, i no gat wanpela sik o binatang i bin stap inait.:



Ol woklain bilong NAQIA i go lukluk raun long Gabadi rais projek na sekim ol binatang bilong rais. (L-R) Junia Entomolojist Pierre Dobunaba, Junia Botanist Lourie Oki na Kedet Opisa Bola Asaingu.

Soka tim Hekari Yunaited promotim pait egens TB

James G. Kila i raitim

SEMPION soka tim bilong PNG insait long Nesenel Soka Lig, Hekari Yunaited i bin soim olsem ol i no spots tim tasol, ol i ken promotim tok save na infomesen egensim ol sik na rot long daunim.

Long las tupela wiken i go pinis dispela sempion soka klap we i save makim PNG long ol bikipela soka klap pilai long Pasifik i bin go long Madang long pilai wantaim Madang Futbol Klap na ol i

wokabout i go autsait wantaim ol t-siot we i gat ol gutpela toktok long pait egensim TB.

Tubekulosis em wangepa bikipela sik planti lain long kantri i gat, tasol i gat rot na marasin i stap pinis long daunim.

Planti ol toktok na tok save na infomesen long rot long daunim sik TB long kantri i go aut pinis long midia olsem radio, television, niuspepa na ol na tu ol edvataismen long stopim sik ya.

Praim Minista Peter O'Neill i tokaut long posisen bilong

gavman long pait egensim sik TB na i putim mani long Nesenel Dipatmen ov Helt long baim ol marasin long daunim sik ya long kantri bilong yumi.

Spots tu em gutpela rot long promotim ol eksen o toktok we i ken givim gutpela tingting na save long ol pipel long go long hausik na kisim marasin long stopim dispela sik.

Olsem na Hekari Yunaited soka klap i soim bikipela piksa tru long promotim pait egensim TB.



Ol pilaia bilong Hekari Yunaited i wetim ol t-siot i gat toktok long pait egensim TB em ol i werim long Madang. *Poto: James G.Kila*

Lig bilong Laip i trenim moa skul tisa

LIG bilong Laip program i trenim 188 praimer na elementri skul tisa long kamapim ragbi lig-bes long fil na insait long klasrum tu.

Dispela program i wok wantaim ol skul long 4-pela rijon long PNG na yusim ragbi lig olsem tul bilong sapotim edukesen.

"I bikipela samting long trenim ol tisa long Lig bilong Laif program long wanem ol i ken save gut long yusim ragbi lig long kisim edukesen, na pilim gut long skulim dispela program long 5-pela wik," Jenerel Menesa bilong NRL PNG long kantri i tok.

Em i tok ol i amamas long skulim 188 tisa long dispela tem na mipela i redi long statim trening wantaim ol tisa long Bogenvil long dispela mun.

Long dispela tem bai progam i go aut long 16 praimer na elementri skul insait long Nesenel Kapitel Distrik (NCD), Is Nu Briten na Isten Hailans provins, na em bai op long Atonomes Rijon bilong Bogenvil.

Ol klas i stap insait long dispel trening bai kisim 5-pela trening long ragbi lig long fil na insait long klasrum we i no long resis na em bilong ol meri na man sumatin wantaim.

Dispela trening bai kos bai

givim gutpela save na skil long ol tisa long sapotim ol NRL PNG developmen opisa long karimaut 5-pela trening na long go het wantaim trening long skul bilong ol.

Ol tisa long Morata Praimeri i tok ol i bai yusim ragbi lig olsem edukesen tul long karimaut dispela 5-pela wik program.

"Mi laik go het long dispela program bikos em i mekim ol pikinini i laik long kam long skul," wangepa tisa, Nanduka Tepi i tok.

Dispela program i helpim na senisim pasin bilong ol sumatin na ol i laik long go long skul.



NRL Lid Developmen opisa long Nesenel Kapitel Distrik, Richard Ora, i go pas long trenim ol tisa long Morata Praimeri skul long NCD. *Poto: NRL Midia*

THE PAPUA NEW GUINEA

ECOFORESTRY FORUM Inc.

Supporting sustainable forest management and good governance in the forestry sector.

pngeff@ecoforestry.org.pg

www.ecoforestry.org.pg

The Papua New Guinea Eco-Forestry Forum Inc. PO Box 3217 Boroko 111NCD, Papua New Guinea Telephone +(675) 3239050 Facsimile +(675) 3254610

Forest Minister mas tokaut klia long wanem hap tru ol i rausim na putim Log Export Developmen Levi (LEDL)

PNG Eco-Forestry Forum na ol memba blong em i singautim Minister blong Forest long tok out klia long dispela kantri long wonem as na long wonem hap dispela K130 millien moni mak bilong ol Log Expot Developmen Levi (LEDL) Ministry blong em i bin putim long en.

Dispela singaut i bihainim askim bilong Memba blong Kikori, Mark Maipakai long Palamen long 18 de blong mun Februari 2015 we i luk olsem gavaman i rausim dispela moni we i stap pinis long gutpela trust akaun igo long bung moni blong steit.

Eco-Forestry Forum na ol memba, long makim maus bilong ol papa blong bus na diwai long ples husait i orait long kisim sevis long dispela LEDL moni i tok aut strong long Forest Minister long mekim stretpla toktok long wanem as na wanem hap dispela moni i stap na tu tokaut klia long wanem rot ol i ken isi long kisim dispela moni.

Dispela LEDL moni i save kam long levi sas blong ol raun log expot olsem mak K8 long wan wan kiubic mita long olgeta point we sip i orait long lusim kantri wantaim ol diwai. As blong dispela levi em blong kamapim gutpela developmen projek na sevis insait long ol komyuniti insait long ol logging aria.

Dispela proses i bin kamap long sapotim ol wok bilong Distrik na Provinsel sevis impruvmen program long karim sevis i go long ples stret we ol man na meri i nidim stret.

PNG Eco-Forestry Forum Bod wantaim ol memba na patna blong em i tokout strong i go long Forest Minister long:

1. Tokaut klia long wanem as ol i rausim ol LEDL moni long displa trust akaun na tu tok out klia sapos dispela moni i stap seif na ol papa blong graun na diwai i ken kisim long wonem time ol i laik kisim.
2. Tokaut klia long ol papagraun na dispela kantri wanem hap dispela Log Developmen Expot Levi (LEDL) ol i stap nau long en.
3. Hariap long kisim moni kam bek long trust akaun olsem em i save stap bipo long mekim wok blong em long sevisim komyuniti long ples.

Mipla tok strong tu olsem dispela levi moni em i bilong developmen bilong ol man na meri long ol logging hap long ples olsem na ol i mas yusim gut long ol rot lo i tok long en.

Cosmas Makamet

Chairman-PNG Eco-Forestry Forum



Salensim 9-pela wik saspensen sas long pilaia bilong Parramatta Eels, Junia Paulo, long tromoim bal inap kamapim bagarap long narapela

Paulo bai sanap long judisel kot long NRL hetkwata long Sydney. Fowed pilaia bilong Parramatta i bin kisim gred tri sas long tromoim bal inap kamapim bagarap bihain em i takolim nogut huka bilong Manly, Matt Ballin long pilai we Eels i bin bagarapim Sea Eagles, 42-12 long Fraide nait. Klap i tok sapos ol i daunim sas i go long gret 2, Paulo husat i gat 21 krismas, bai orait long kisim 4-pela wik saspensen na em bai tok em i gilti long sas. Long wankain taim, Mitch Moses em faiveit bilong West Tigers bai abrusim saspensen long mekim hai takel long William Zillman. Moses i bin tok em i gilti we i bin lusim fulbek bilong ol Titans i wari long 68 minit bilong wanpela strongpela gem i lukim ol Tiger i winim ol Titan long wanpela poin wantaim skoa, 19-18. Zillman i bin flai i kam daun long Moses na Moses i bin hukim em long nek, tasol NRL mets riviui komiti i bin wokim disisen olsem han bilong Moses i laik holim Zillman i go antap, ol i daunim sas i go long gret 2 tasol.



Bangladesh i selebretim Wol Kap win long Ingran

PLANTI fen, ol foma pilaia na midia i no inap bilipim tru na ol i kirap nogut stret long Ingran i lus long Bangladesh we nau i lukim ol I no inap go insait long Wol Kap. Ol i autim ol belhat na kirap nogut bilong ol long sosel midia. Long wankain taim, bikpela amamas i bin pulapim ol Bangladesh lain na ol i selebret histori win bilong ol we wol na moa yet, ol Australia lain i joinim. Sosel Midia i tok namba 15 ran bilong Bangladesh we i bin daunim na winim Ingran bai stap olsem bikpela kirap nogut rekot long Wol Kap pilai. Lukim long Twitter ol toktok na piksa bilong ol man bihain tasol long dispela pilai na kirap nogut.

Kriket Wol Kap



Josh Dugan bai no inap pilai long tripela mun bihain long em i kisim bikpela bagarap long skru bilong em

Fulbek bilong St George Illawara, Josh Dugan bai no inap pilai long planti gem bilong NRL sisen bihain long em i kisim bikpela bagarap long skru bilong em taim St George Illawara i bin lus long Mande nait, 12-4- long Melbon. Bagarap em i kisim long Kogarah Oval i mekim em i no nap pilai long tripela mun,na em bai no inap pilai tu long opening bilong Stet ov Orijin pilai long Me 27. Ol St George Illawara opisel i prèt long gutpela pilaia bilong ol, tasol sek long sken masin bai tokaut long bagarap i stap long wanem mak stret.



Ol Brumbies i sainim gen Sam Carter, Scott Fardy na Josh Mann-Rea

Ol Brumbies i kisim tripela gutpela pilaia bai strongim ol long Super Ragby kles wantaim Queensland long dispela Sarere bihain ol i sainim tripela ki fowet pilai. Lok Sam Carter, huka Josh Mann-Rea na bekrowa Scott Fardy i bin sainim kontrak long narapela tupelo yia i kam wantaim Canberra Super Ragbi tim. Australian Ragbi Yunien i bin sainim bek gen Carter na Fardy, we namel long ol i pilai pinis long 31 Test pilai. Dispela i pinisim tu ol askim olsem ol bai lusim long joinim ol klap ovasis bihain long Ragbi Wol Kap. Carter, husat i bin pilai 11-pela Tes pilai long ol Wallabies long 2014 i tok em i no save gat tingting long go na pilai ovasis bihain long pinis bilong sisen.

India i winim Ireland long Hamilton wantaim 8-pela wiket

India i autim strongpela pilai bilong Ireland long win wantaim skoa 8 wiket long Seddon Park long Tunde na nau em i stap namba wan long Pul B. India i bin winim Ireland long 249 wantaim ol gutpela betsmen olsem Rohit Sharma na Shikhar Dhawan. Tupela pilaia ya i bin mekim save long wokim ol strongpela paitim na ol gutpela singel.



Ol wiken spot long poto

Ol poto: Nicky Bernard



Straika bilong Admiralty i train tanim tasol fulbek bilong Pom FC i pasim em. Pom FC i win 3-2



RESIS LONG BAL Ol pilaia bilong Admiralty FC na Pom FC i resis long hetim bal long mak bilong ol boi Manus



Straika bilong Lae FC i ronawe long fulbek bilong Oro FC long NSL pilai bilong ol long Mosbi. Lae i win 4-0



GORDONS TAS I HOT: Pilaia bilong Erama Maggies i train long ronawe long pilai bilong KB Eels long Gordons tas resis semi fainal. KB Eels i winim pilai na bai pilai long gren fainal long Sande wantaim Steelers

TOKSAVE: Salim ol spots dro bilong yu kam long Feks; 325 2579, e-mel; sporwol@wantok.com.pg o kam lusim long Wantok Niuspepa opis long Able Building Complex long Central Waigani, NCD.

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



**Emi tuna
bilong PNG**

PROUDLY
**PNG
MADE**

Manufactured by:



RD Tuna Canners Ltd.

Moa mit na
oil insait



DIANA Blu

TUNA IN OIL

Lae City Dwellers lukluk long narapela win



Nicky Bernard i raitim

LAE City Dwellers bai i no inap lukluk go bek taim ol kisim FC Pom long dispela wiken Telikom Nesenel Soka Lig resis bilong ol long Bomana long Mosbi.

City Dwellers i bin mekim wanpela bikpela win bilong ol long las wik taim ol kisim Oro FC na winim ol wantaim 4-0. Dispela win bilong ol i mekim ol boi Morobe olsem ol bai i no inap kam isi taim ol bungim ol narapela tim.

Lae City Dwellers i gat planti ol yangpela mangi stap insait long tim bilong ol, we i mekim isi tru long ol long tok-tok i go kam taim ol pilai long pilai graun. Na tingting bilong ol i op taim kosa bilong ol tokim long mekim wanem kain pilai.

Dispela wiken bai wanpela strongpela pilai bai ol mekim taim ol kisim FC Pom long Bomana CS graun long namba tu gem bilong dabol gem long Mosbi.

FC Pom bai i no inap kam isi tu long ol mangi Lae long wanem ol kisim liklik strong taim ol winim Admiralty 3-2 long las wik.

Lae Dwellers, i gat olgeta 11-pela pilaia long pilai graun save long mekim pilai bilong ol na sapos ol mekim wankain pilai las wik bai FC Pom bai hat liklik long stopim ol long gol mak bilong ol. Lae City Dwellers bai win long spit straika bilong ol sapos FC Pom i no was gut long em.

FC Pom bai win long sapos Lae FC givim ol planti kona na fri kik we straika bilong FC Pom save long putim stret bal long kamap gol.

Long narapela ol pilai Hekari bai kisim Oro FC long Bomana pilai graun bihain long win bilong ol long Madang na malolo bilong ol las wik. Oro FC mas putim strongpela bek lain long stopim ol straika bilong Hekari.

Admiralty FC bai flai go long Lae long kisim ol yangpela Besta PNG United FC long Sir Ignatius Kilage stadium. Admiralty i no winim wanpela pilai bilong ol yet na sapos ol yangpela straika bilong ol kisim planti bal long namel ol bai kamap gol na mekim namba wan win bilong ol.

Dispela wiken bai lukim ol poin lata bai senis liklik sapos sampela bikpela win kam long dispela raun 8 pilai.

TRAIM BUN: Straika bilong Admiralty (hankais) i resis wantaim pilaia bilong POM FC
Poto: Nicky Bernard




PMV

DIESEL OIL

PMV OIL BILONG YUMI




Location	Phone Number
PORT MORESBY	325 5255
LAKE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg
Website: www.borokomotors.com.pg